

**LA GRANDE DANSE  
MACABRE DES  
HOMMES ET DES  
FEMMES PRÉCÉDÉE  
DU DICT DES TROIS...**

---





10.15

A solid black rectangular mark, possibly a stamp or a piece of tape, located below the handwritten text.



*LA GRANDE*  
**DANSE**  
**MACABRE**

DES HOMMES ET DES FEMMES

*PRÉCÉDÉE DU DICT DES TROIS MORS ET DES TROIS VIFZ,  
DU DÉBAT DU CORPS ET DE L'ÂME,  
ET DE LA COMPLAINTÉ DE L'ÂME DAMPNÉE.*



PARIS,

RAILLIEU, LIBRAIRE, QUAI DES GRANDS-AUGUSTES, N° 43.



*LA GRANDE*  
**DANSE**  
**MACABRE**



# LA GRANDE

111



DES HOMMES ET DES FEMMES

*PRÉCÉDÉE DU DICT DES TROIS MORS ET DES TROIS VIFZ,  
DU DÉBAT DU CORPS ET DE L'ÂME,  
ET DE LA COMPLAINTÉ DE L'ÂME DAMPNÉE.*



PARIS,

BAILLIEU, LIBRAIRE, QUAI DES GRANDS-AUGUSTINS, N° 43.





14

Ayant acquis il y a plusieurs années les bois gravés de la DANSE MACABRE DE TROYES, nous en donnons une nouvelle édition conforme quant au texte à l'édition de 1486, dont l'édition de Jehan Lecocq, Troyes, 1539, était la copie et qui fut copiée à son tour par Garnier, de Troyes, en 1641.

Il y a certainement loin de cette copie à l'original dont nous reproduisons le texte, mais l'impossibilité de rencontrer les éditions des XV<sup>e</sup> et XVI<sup>e</sup> siècles, leur prix élevé dans les ventes publiques, (1) quand par hasard il s'en présente, nous fait penser que notre édition sera bien accueillie des amateurs, et remplacera les éditions de Troyes avec leur *langage renouvelé et plus poli de notre temps*, et souvent tronqué, qui ne donne qu'une faible idée de l'original, dont nous avons conservé soigneusement l'orthographe en y ajoutant seulement la ponctuation, inconnue ou négligée au XV<sup>e</sup> siècle.

(1) Un exemplaire de la *Danse Macabre*; Paris, Gillet Coustiau, 1492, s'est vendu le 19 Avril 1862, à la salle Silvestre, 1170 francs, très-court de marges et dérelié.





## *L'ACTEUR.*

**O** créature roysonnable  
Qui désires vie éternelle .  
Tu as cy doctrine notable :  
Pour bien finer vie mortelle .  
La dance, macabre s'appelle :  
Que chascun à danser apprant .  
A l'homme et femme est naturelle  
Mort n'épargne petit ne grant .

En ce miroer chascun peut lire  
Qui le convient ainsi danser  
Saige est celuy qui bien si mire  
La mort , le vif fait avancer  
Tu vois les plus grans commencer  
Car il n'est nul que mort ne tiere :  
C'est piteuse chose y panser .  
Tout est forgé d'une matière .



## LE PREMIER MORT.

**N**ous par divine sentence  
 Qui vivés en estatz diuers  
 Tous : danserés ceste danse  
 Une foyz. et bons : et pervers  
 Et si seront mengés de vers  
 Vos corps . hélas : regardez nous  
 Mors . pourris . puans . descouvers  
 Comme sommes : tels serez vous.

## LE SECOND MORT.

Dictes nous par quelles raisons  
 Vous ne pensez point a morir  
 Quant la mort va en vos maisons ;  
 Huy l'ung : demain l'autre quérir  
 Sans qu'on vous puisse secoarir  
 C'est mal vivre : sans y penser  
 Et troup grant danger de périr.  
 Force est qu'il faille ainsi danser.

## LE TIER MORT.

Entendez ; ce que je vous dis  
 Jeunes et vieulx petis et grans  
 De jour en jour selon les dis  
 Des sages : vous alez mourans  
 Car vos jours vont diminuans  
 Pour quoy : tous serez trespassez  
 Ceulx qui vivez : devant cent ans :  
 Las : cent ans seront tost passez.

## LE QUART MORT.

Devant quil soient cent ans passés  
 Tous les vivans comme tu dis  
 De ce monde seront passés  
 En enfer : ou en paradis  
 Mon compagnon : mais je te dis.  
 Peu de gens sont qui aient cure  
 Des tréspassez : ne de nos dis.  
 Le fait d'eulx : git en adventre.



LE MORT.

LE MORT.

**M**ous qui vivez : certainement  
Quoy qu'il tarde ainsi danserés :  
Mais quant ? Dieu le seot seulement  
Advisez comme vous ferés.

Dam Pape : vous commencerés  
Comme le plus digne seigneur :  
En ce point honoré serés  
Aux grans maistre est deu l'honneur.

LE PAPE.

Hée : faut il que la danse mainne  
Le premier : qui suis dieu en terre  
J'ay eu dignité souverainne  
En l'eglise comme saint Pierre  
Et comme autre ; mort me vient querre  
Encore point morir ne cuidasse  
Mais la mort a tous maine guerre  
Peu vault honneur que si tost passe.

Et vous le non pareil du monde  
Prince et seigneur grant emperière  
Laisser fault la pomme d'or ronde :  
Armes : sceptre : timbre : bannière.  
Je ne vous lairay pas derrière  
Vous ne povez plus signorir  
J'en maine tout c'est ma manière.  
Les fils Adam fault tous morir.

L'EMPEREUR.

Je ne scay devant qui j'appelle  
De la mort : qu'ansi mo demainne.  
Armé me fault de pic, de pelle :  
Et d'un linseul ce'mest grant paine  
Sur tous ay eu grandeur mondaine :  
Et morir me fault pour tout gage.  
Qu'est ce de ce mortel demainne  
Les grans ne l'ont pas davantagz.



## LE MORT.

**V**ous faites l'esbay se semble  
 Cardinal : sus legièrement  
 Suivons les autres tops ensemble  
 Rien ne vault ébaïssement.  
 Vous avez vescu haultement  
 Et en honneur à grant devis :  
 Prenez en gré l'esbatement.  
 En grant honneur se pert l'advis.

## LE CARDINAL.

J'ay bien cause de mesbaïr  
 Quant je me voy de cy près pris  
 La mort m'est venue assaillir :  
 Plus ne vestiray. vert ne gris.  
 Chapeau rouge. chappe de pris  
 Me fault laisser à grant destresse :  
 Je ne l'avoye pas appris.  
 Toute joye fine en tristesse.

## LE MORT.

Venez noble roy couronné  
 Renommé de force et proesse  
 Jadis fustez environné  
 De grant pompez de grant noblesse  
 Mais maintenant toute hauteesse  
 Lesserés : vous n'este pas seul.  
 Peu arés de vostre richesse.  
 Le plus riche n'a qu'un linceul.

## LE ROY.

Je n'ay point appris à danser,  
 A danse et note si sauvage ;  
 Las on pent veoir et penser  
 Que vault orgueil. force. linaige.  
 Mort destruit tout : c'est son usage :  
 Aussi tost le grant que le moindre  
 Qui moing se prise plus est sage.  
 En la fin fault devenir cendre.



LE MORT.

**L**égat vous êtes arrêté :  
Dehors ne irés je vous affie  
Tenez vous seur. et apresté  
Pour morir. je vous certiffie  
Que mort aujourd'huy vous deffie  
Entendez y : c'est vostre fait.  
En vie longue : nul ne si fie.  
Le vouloir Dieu doit estre fait.

LE LEGAT.

Du Pape je avoye puissance  
Se ne fut cet empeschement :  
D'aller comme légat en France  
Mais faire me fault autrement  
Car morir voi : quant. ou comment.  
Ne en quel lieu : je ne say pas  
Mon Dieu est : qui le scet seulement  
Mort suit l'homme pas après pas.

LE MORT.

Très noble duc : renom avez  
D'avoir fait par votre proesse  
Par tout : ou vous êtes trouvez :  
Beaulx fais d'armes : et de noblesse.  
Monstrez cy vostre ardiessie :  
Et dansez pour gagner le pris.  
Après tout homme la mort chasse.  
Les grans souvent sont premier pris.

LE DUC.

De mort suis assailliz très fort  
Et ne say tour pour me deffendre  
Je voy que la mort : le plus fort.  
Comme le fleible : tend à prendre.  
Que doy je faire : l'actendre  
Pacienment, et du bon cuer  
A Dieu de ses biens grace rendre.  
Hault estat n'est pas le plus seur.



## LE MORT.

**P**atriarche pour basse chièr  
 Vous ne pouvez estre quitté  
 Votre double croix qu'avés chièr  
 Ung aultre aura : c'est équité.  
 Ne pensez plus a dignité :  
 Ja ne serés pape de Rome.  
 Pour rendre compte este cité  
 Folle espérance déçoit l'homme.

## LE PATRIARCHE.

Bien aperçoy que mondain honneur  
 Ma deceu : pour dire le voir  
 Mes joie a torné en douleur :  
 Et que vault tant d'honneur avoir :  
 Trop hault monter n'est pas savoir  
 Haulx éstas gaitent gens sans nombre  
 Mais peu le veulent percevoir.  
 A hault monter le faiz encombre.


## LE MORT.

C'est de mon droit que je vous mainne  
 A la dance gent connestable.  
 Les plus fors come Charlemaigne.  
 Mort prent : c'est chose véritable.  
 Rien n'y vault chièr espouventable  
 Ne fortes armés en cest assaut  
 D'un coup j'abas le plus estable.  
 Rien n'est d'armés quant mort assaut.

## LE CONNESTABLE.

J'avoye encor intencion  
 D'assaillir chateau. forteresse :  
 Et mener à subjection  
 En acquérant honneur. richesse :  
 Mais je voy que toute proesso  
 Mort met a bas : c'est grant despit  
 Tout lui est ung : douceur rudesse.  
 Contre la mort n'a nul respit :





LE MORT.

**U**ne vous tirés la teste arriere  
 Archevesque : tiré vous près  
 Avés vous peur qu'on ne vous tière  
 Ne doubtez : vous venrés après.  
 N'est pas toujours la mort enprès  
 Tout homme : et le suit coste à coste  
 Rendre convient debtes. et prestz.  
 Une fois fault compter à l'oste.

L'ARCHEVESQUE.

Las : je ne say ou regarder  
 Tant suis par mort à grant Destroit  
 Ou fuir ay-je pour moy aider :  
 Certes qui bien la congnoistroit  
 Hors de raison jamais nistroit  
 Plus ne gerray en chambre peinte.  
 Morir me convient c'est le droit.  
 Quant faire fault c'est grant contrairte:

LE MORT.

Vous qui entre les grans barons  
 Avés eu renom chevalier :  
 Obliez trompettes. clarons.  
 Et me suivés sans sommeillier :  
 Les dames soliés revellier :  
 En faisant danser longue pièce.  
 A autre danse fault vieillier  
 Ce que l'un fait l'autre dépièce.

LE CHEVALIER.

Or ay-je esté autorisé  
 En pleuseurs fois : et bien famé  
 Des grans. et des petits prisé  
 Avec ce des dames amé.  
 Ne oncques ne fus diffamé  
 A la court de seigneur notable :  
 Mais a ce coup suis tout pasmé  
 Dessoubz le ciel n'a rien estable.



LE MORT.

**E**stantost n'aurez vaillant ce pic  
Des biens du monde. et de nature.  
Evesque : de vous il est pic  
Non ostant votre prélatüre.  
Vostre fait gît en aventure.  
De vos subgés fault rendre compte :  
A chascun Dieu fera droicture.  
N'est pas asseur qui trop hault monte.

L'EVEQUE.

Le cueur ne me peult esjouir  
Des nouvelles que mort m'apporte  
Dieu voudra de tout compte oïr :  
C'est ce que plus me desconforte :  
Le monde aussi : peu me conforte  
Qui tous à la fin deshérite.  
Il retient tout : nul rien n'emporte  
Tout ce passe fors le mérite.

LE MORT.

Avancé vous gent escuier  
Qui savés de danser les tours.  
Lance pourtiés : et escu hier :  
Et huy vous finérés vos jours.  
Il n'est rien qui ne preigne cours.  
Dansez : et panser de suir  
Vous ne pouvez avoir secours.  
Il n'est : qui mort puisse fuir.

L'ESCUIER.

Puisque mort me tient en ses las  
Au moins que je puisse un mot dire  
A dieu déduis : a dieu solas :  
A dieu dames plus ne puis rire.  
Pensez de l'ame : qui désire  
Repos. ne vous chaille plus tant  
Du corps : que tous les jours empire  
Tous fault morir on ne scet quant.



LE MORT.

LE MORT.

**A**bbé: venez tost : vous fuyez :  
N'ayez ja la chièr esbaye.  
Il convient que la mort suyvez :  
Combien que moult l'avez haye  
Commandez a Dieu l'abaye :  
Que gros et gras vous a nourry.  
Tost pourrirez a peu de aye  
Le plus gras est premier pourry.

L'ABBÉ.

De cecy n'eusse point envie :  
Mais il convient le pas passer  
Las : or n'ay-je pas en ma vie  
Gardez mon ordre sans casser  
Gardé vous de trop embrasser  
Vous qui vivez au demorant :  
Se vous voulez bien trépasser  
On s'avise tard en mourant.

Bailly qui savez qu'est justice  
Et hault et bas : en mainte guise :  
Pour gouverner toute police.  
Venez tantost a ceste assise.  
Je vous adjourne de main mise  
Pour rendre compte de vous fais  
Au grant juge : qui tout ung prise.  
Ung chascun portera son fais.

LE BAILLY.

Hée Dieu : vécy dure journée :  
De ce coup pas ne me gardoye  
Or est la chance bien tournée :  
Entre juge , honneur avoye.  
Et mort fait ravalier ma joye :  
Qui m'a adjourné sans rappel  
Je ne voy plus ne tour ne voye.  
Contre la mort n'a point d'appel.



LE MORT.

LE MORT.

**M**aistre : pour vostre regarder  
 En hault : ne pour vostre clergie :  
 Ne pouvez la mort retarder.  
 Cy ne vault rien astrologie.  
 Toute la généalogie  
 D'Adam qui fut le premier homme  
 Mort prent : ce dit théologie.  
 Tous fault mourir pour une pomme.

## L'ASTROLOGIEN.

Pour science ne pour degréz :  
 Ne puis avoir provision.  
 Car maintenant tous mes regrez  
 Sont : morir à confession.  
 Pour finale conclusion  
 Je ne scay rien de plus descrive.  
 Je pers cy toute advision.  
 Qui vouldra bien mourir bien vive.

Bourgeois hastez vous sans tarder  
 Vous n'avez avoir ne richesse  
 Qui vous puisse de mort garder  
 Se des biens dont eustes largesse :  
 Aves bien usé, c'est sagesse.  
 D'autrui vient tout : a autrui passe  
 Fol est qui d'amasser se blesse.  
 On ne scet pour qui on amasse.

## LE BOURGEOIS.

Grant mal me fait si tost laissier  
 Rentes : maisons : cens : norritures  
 Mais pouvres : riches abaissier  
 Tu fais, mort : telle est ta nature  
 Sage n'est pas la créature.  
 D'amer trop les biens qui demeurent  
 Au monde : et son sien de droiture.  
 Ceux qui plus ont : plus enviz meurent.



LE MORT.

LE MORT.

**ire** chanoine prébendez :  
 Plus ne aurez distribucion :  
 Ne gros : ne vous y actendez :  
 Prenez-ty consolation  
 Pour toute rétribution  
 Morir vous convient sans demeure  
 Ja n'y aurez dilation  
 La mort vient qu'on ne garde l'heure.


LE CHANOINE.

Cecy guère ne me conforte :  
 Prébendé fus en mainte église.  
 Or est la mort plus que moy forte  
 Que tot en mainne : c'est sa guise  
 Blanc surpelis et aumusse grise  
 Me fault laisser : et à mort rendre.  
 Que vault gloire sy tost bas mise.  
 A bien morir doit chascun tendre.

Marchant : regardez par deça.  
 Pleuseurs pays avez cerchié  
 A pié : et à cheval de piéça :  
 Vous n'en serés plus empeschié  
 Vécý vostre dernier marchié.  
 Il convient que par cy passez.  
 De tout soing serez despeschié.  
 Tel convoite qui a assez.

LE MARCHANT.

J'ay esté amont et aval  
 Pour marchander ou je pouvoye  
 Par long temps a pié : à cheval :  
 Mais maintenant pers toute joye  
 De tout mon pouvoir acqueroye :  
 Or ay je assez. mort me contraint.  
 Bon fait aller moyenne voye.  
 Qui trop embrasse peu estraint.



LE MORT.

**H**ommes plusieurs sont chers tenus  
 Au siècle. et en religion.  
 Lesquels touteffois sont vequs  
 De gens de basse condition  
 La doctrine et correction  
 De vous maistre : telx les a fait.  
 Or mourrez vous : conclusion.  
 Homme par mort est tout deffait.

## LE MAISTRE D'ESCOLE.

Grammaire est science sans fable :  
 De toutes autres ouverture :  
 A jeunes enfens couvenable  
 Car sans elle : je vous assure  
 Que autres sciences n'ont cure  
 De entrer en entendement.  
 Ainsi le veult Dieu. et nature.  
 Par tout il fault commencement.

LE MORT.

Sur coursier ne cheval de pris  
 Homme d'armes ne monterés  
 Plus. puis que la mort vous'a pris :  
 Advisez comme vous ferés  
 Le monde ja tost laisserés  
 Ne actendez plus courir la lance  
 Regardez moy : tel vous serés.  
 Tous jeux de mort sont a oultrance.

## L'HOMME D'ARMES.

A Dieu le service du roy  
 Que soloye faire soir et main.  
 De mort suis prins en désarroy :  
 Sans respit jusques a demain.  
 A ceste danse par la main  
 Je suis menez piteusement.  
 Mort y contraint tout homme humain  
 Mourir fault : on ne seet comment.



LE MORT

LE MORT.

**H**omme d'armes plus ne resté  
 Allez sans faire resistance  
 Cy ne pouvez rien conquesté.  
 Vous aussi homme d'astinence  
 Chartreux : prenés en patience  
 De plus vivre n'ayez mémoire.  
 Faitez vous valoir à la danse.  
 Sur tout homme mort a victoire.

LE CHARTREUX.

Je suis au monde piéça mort  
 Par quoy de vivre ay moing envie  
 La soit que tout home craint mort  
 Puis que la char est assouvie :  
 Plaise a Dieu que l'ame ravie  
 Soit es cielx après mon tréspas.  
 C'est tout néant de ceste vie.  
 Tel est huy : qui demain n'est pas.

Sergent qui portez celle mace  
 Il semble que vous rébellez.  
 Pour néant faitez la grimace :  
 Se on vous grève si appelez.  
 Vous esté de mort appelez.  
 Qui lui rebelle il se déçoit.  
 Les plus fort sont tost ravallez  
 Il n'est fort qu'aussi fort ne soit.

LE SERGENT.

Moy qui suis royal officier :  
 Comme m'ose la mort frapper  
 Je fasoye mon office hier  
 Et elle, me vient huy happer  
 Je ne scay quelle part eschapper :  
 Je suis pris deça et delà.  
 Malgré moy me laisse apper :  
 Enviz meurt qui appris ne l'à.





LE MORT.

**M**a maistre : par la passerés  
 N'ayez ja soing de vous deffendre  
 Plus hommes n'espouvanterés.  
 Après moine sans plus actendre  
 Ou pensez vous : ey fault entendre  
 Tantost auez la bouche close.  
 Homme n'est : fors que vent et cendre  
 Vie d'homme est moult peu de chose.

LE MOINNE.

J'amasse mieulx encor estre  
 En cloistre et faire mon service  
 C'est ung lieu dévost et bel estre  
 Or ay je comme fol et nice.  
 Du temps passé commis maint viee  
 De quoy n'ay pas fait pénitance  
 Souffisant. Dieu me soit propice  
 Chascun n'est pas joyeux qui danse.

Usure est tant mauvaiz péchié  
 Comme chascun dit : et raconte.  
 Et cest homme qui approchié  
 Se sent de la mort n'en tient conte

LE MORT.

Usurier, de sens desruglés  
 Venez tost : et me regardez.  
 D'usure estes tant aveuglés :  
 Que d'argent gaignez tout ardez  
 Mais vous en serés bien lardez  
 Car se Dieu qui est merveillex  
 N'a pitié de vous : tout perdez  
 A tout perdre est coup périlleux.

L'USURIER.

Me convient-il si tost morir  
 Ce m'est grant peine et grévance  
 Et ne me pourroit secourir  
 Mon or, mon argent, ma chevance,  
 Je vois morir la mort m'avance  
 Mais il me desplait somme toute  
 Qu'est-ce de male acoustumance  
 Tel a beaulx yeux qui ne voit goute.

Mesme l'argent qu'en ma main compte  
 Encore à usure me preste  
 Il devra de retour au compte  
 N'est pas quitte qui doit de reste.

LE POVRE HOMME.





LE MORT.

LE MORT.

**M**édecin a tout votre orinne  
Voies vous icy qu'amander  
Jadis scutes de médecine  
Assés pour pouvoir commander.  
Or vous vient la mort demander.  
Comme autre vous convient morir  
Vous ny pouvés contremander.  
Bon mire est : qui se scet guérir.

LE MÉDECIN.

Long temps a quen l'art de phisique  
J'ay mis toute mon estudie.  
J'avoye science et pratique.  
Pour guérir mainte maladie.  
Je ne scay que je contredie  
Plus n'y vault herbe ny racine  
N'autre remède quoy qu'on die  
Contre la mort n'a médecine.

Gentil amoureux gent et frique  
Qui vous cuidez de grant valeur  
Vous estes pris, la mort vous pique  
Le monde larés a douleur.  
Troup l'avez amer : c'est foleur  
Et a morir peu regarder  
Ia tost vous changerés couleur.  
Beauté n'est qu'image farder.

L'AMOUREUX.

Hélas : or n'y a il secours  
Contre mort, a Dieu amourettes :  
Moult tost va jeunesse a decours  
A Dieu chapeaux bouqués fleurètes.  
A Dieu amans et pucelettes :  
Souviennne vous de moy souvent.  
Et vous mirez se sages estes :  
Petite plue abat grant vent.



LE MORT.

LE MORT.



advocat sans long procès faire  
 Venez vostre cause plaidier.  
 Bien avés sceu les gens actraire  
 De piéça : non pas duy ne d'ier.  
 Conseil si vous ne peut aidier.  
 Au grand iuge vous fault venir  
 Savoir le devés sans cuidier.  
 Bon fait iustice prévenir.

L'ADVOCAT.

C'est bien droit que raison se face  
 Ne ie n'y scay mectre deffence :  
 Contre mort n'a respit ne grace :  
 Nul n'apelle de sa sentence.  
 J'ay eu de l'autrui quant ie y pense  
 De quoy ie doubte estre repris  
 A craindre est le iour de vengeance  
 Dieu rendra tout a iuste pris.

Ménestrel qui dansés et notés  
 Savez : et avez beau maintien  
 Pour faire esioir sos. et sotes :  
 Qu'en dicte vous. alons nous bien  
 Monstrer vous fault puisqu'on vous tien  
 Aux autres cy : ung tour de danse  
 Le contredire n'y vault rien  
 Maistre doit monstrer sa sciencie.

LE MENESTREL.

De danser ainsi n'eusse cure  
 Certes très enuiz ie m'en mesle :  
 Car de mort n'est painne plus dure  
 J'ay mis sub le banc ma vielle  
 Plus ne corneray sauterelle  
 N'autre danse : mort m'en retient  
 Il me fault obeir a elle.  
 Tel danse a qui a cuer n'en tient.



LE MORT.

LE MORT.

**M**assés curé sans plus songer :  
 Je sens qu'estez abandonné.  
 Le vif, le mort soliés menger  
 Mais vous serés aux vers donné.  
 Vous futes iadis ordonné  
 Miroir d'autrui. et exemplaire.  
 De vous fais serés guirdonné.  
 A toute painne est deu salaire.

LE CURE.

Veulle ou non il fault que me rende  
 Il n'est homme que mort n'assaille.  
 Hée : de mes parrosiens offrende  
 N'auray iamais : ne funéraille,  
 Devant le iuge fault que ie aille  
 Rendre compte las doloureux :  
 Or ay ie grant peur que ne faille.  
 Qui Dieu quitte bien est eueux.

Laboreur qui en soing et painne  
 Avez vescu tout votre temps :  
 Morir fault c'est chose certainne  
 Reculler n'y vault ne contens :  
 De mort devés estre contens  
 Car de grant soussy vous délivre  
 Approchez vous ie vous actens  
 Folz est qui cuyde tousiours vivre.

LE LABOUREUR.

La mort ay souhaité souuent  
 Mais volentier ie la fuisse'  
 J'amaïse mieulx pluye ou vent  
 Estre es vignes ou ie fouisse :  
 Encor plus grant plaisir y prisse  
 Car ie pers de peur tout propos.  
 Or n'est il qui de ce pas ysse.  
 Au monde n'a point de repos.



LE MORT.

**P**romoteur venez à la court  
 Tantost : et soyez advisé  
 Respondre le long, ou le court.  
 Du cas qui vous est imposé.  
 C'est : car vous este accusé .  
 N'avoir pas tousiours iustement  
 De vostre office bien usé  
 En mal fait git amendement.

LE PROMOTEUR.

J'eusse demain receu six solz  
 D'un homme qui est en sentence  
 Pour consentir qui fut absoulz  
 Se l'eusse ester à l'audience.  
 Plus ne me fault penser en ce  
 Mort ma soupris en son embuche  
 Prendre me fault en patience  
 Bien charie droit qui ne trébuche.

LE MORT.

En soussy. peine et travail  
 Avez gardé prisons géolier  
 Souvent on vous a fait resveil  
 Cuidanz dormir ou sommeillié  
 Vous n'en serez plus travaillié  
 Venez danser sans plus de plait  
 Cy est : ou vous devez veillier  
 Il faut morir quand a Dieu plait.

LE GEOLIER.

Je tenoye de bons prisonniers  
 Desquelz l'atendoye recevoir  
 Plenne ma bourse de déniers  
 Pour despence, et pour avoir  
 Les garder, et fait mon devoir  
 De les penser bien loyalment.  
 Quant on meurt on doit dire voir.  
 Dieu scet qui dit vray ou qui ment.



LE MORT.

LE MORT.

**E**lérier : vous avez assez  
 Aller en pélerinage.  
 Trauelle estez : et lassez.  
 Bien appart a vostre visage  
 C'est cy vostre derrenier vouage  
 Que bon vous soit faitez deuoir.  
 La fin couronne tout ouvrage  
 Selon euvre payement auoir.

LE PÉLERIN.

En tous temps yuers et esté.  
 Vouager estoit mon désir.  
 Or suis ie par mort arresté  
 J'en loue Dieu : quant c'est son plésir.  
 Et le prie qui me doint loisir  
 De tous mes pechés confesser :  
 Pour mon ame en repos gésir.  
 Ung iour me faloit tout lesser.

Brégier : dansez legièrément  
 Ici n'est pas qu'on doit songer.  
 Doz brébis sont certainement  
 Maintenant en atruy danger  
 Car vous serez pour abrégier  
 Tost passez. plus ne pouuez viure  
 L'estat de l'homme est tost changer.  
 Qui meurt de maitz malx est deliuré.

LE BERGIER.

Las : or demeurent en grant danger  
 Mes brébis aux champs sans pastour  
 Loups effamés pour les menger  
 A ceste heure sont alentour.  
 Ou pour leur faire acun faulx tour  
 Loups sont mauuais de leur nature.  
 Son crye ils fuent puis font retour.  
 A tous viuans la mort court sure.



LE MORT.

LE MORT.

**L**aicte voye vous aués tort  
 Sus Bergier. après cordelier  
 Souuent auez preschié de mort  
 Si vous devez moing merveillier  
 Ia ne s'en fault esmay Ballier  
 Il n'est si fort que mort n'aresté  
 Si fait bon a morir veillier.  
 A toute heure la mort est preste.

## LE CORDELIER.

Qu'est-ce : que de viure en ce monde.  
 Nul homme a seurte ny demeure :  
 Toute vanité y habonde  
 Puis vient la mort qu'à tost court sure  
 Mendicité point ne me assure  
 Des mesfaits fault paier l'amende.  
 En petite heure Dieu labeure.  
 Sage est le pécheur qui s'amende.

Petit enfant na guère né :  
 Au monde auras peu de plaisance.  
 A la danse seras mené  
 Comme un autre, car mort a puissance  
 Sur tous : du iour de la naissance  
 Convient chascun a mort offrir :  
 Fol est qui n'en a cognoissance.  
 Qui plus vit plus a à souffrir.

## L'ENFANT.

A. a. a. ie ne scay parler  
 Enfant suis : i'ay langue mue,  
 Hier naquis huy m'en fault aller  
 Je ne faiz que entrer et yssue  
 Rien n'ay mesfait. mais de peur sue  
 Prendre en gré me fault c'est le mieulx  
 L'ordenance Dieu ne se mue.  
 Ainsi tost meurt ieune que vieulx.





LE MORT.

LE MORT.

**C**uidez vous de mort eschapper  
Clerc esperdu pour reculer :  
Il ne s'en fault ia défrapper.  
Tel cuide souvent hault aller  
Qu'on voit a cop test raualler  
Prenez en gré : alons ensemble  
Car rien n'y vault le rébeller  
Dieu punit tout quant bon lui semble.

Clerc : point ne fault faire refus  
De danser : faicte vous valoir.  
Vous n'estez pas seul : leuez sus  
Pour tant moins voz en doit chaloir.  
Venez après c'est mon voloir  
Homme noury en hermitaige :  
Ia ne vous en conuient doloir  
Vie n'est pas sur héritaige.

LE CLERC.

LE HERMITE.


Faut il q'un ieusne clerc seruant  
Qui en seruice prent plésir  
Pour cuider venir en auant  
Meure si tost : c'est desplésir  
Je suis quitte de plus choisir  
Aultre estat. il faut qu'ainsi danse  
La mort m'a pris a son loisir.  
Moult remainit de ce que fol pense.

Pour vie dure ou solitaire  
Mort ne donne de viure espace.  
Chascun le voit si s'en fault taire  
Or requier Dieu q'un don me face  
C'est quo tous mes peschies efface  
Bien suis contens de tous ses biens  
Desquelx ia usé de sa grace  
Qui na suffisance il na riens.

LE MORT.

C'est bien dit : ainsi on doit dire  
Il n'est qui soit de mort delivre.  
Qui mal vit il aura du pire :  
Si pense chascun de bien vivre.

Dieu péséra tout à la livre  
Bon y fait penser soir et main  
Meilleure science n'a en liure.  
Il n'est qui ait point de demain.



## LE MORT.

**U**x bonnes gens de villages  
 Auez mangez la poulalle  
 But le vin : faitz grans oultrages  
 Sans payer denier ne maille  
 A tout vostre chapeau de paille  
 Hallebardié : venez avant  
 Et danserés vaille que vaille  
 Autant vault dernier que devant.

## LE HALLEBARDIÉ.

Je crains passer le passage  
 De mort. quant bien ie y regarde  
 Qui ne le craint : n'est pas sage.  
 Rien ny vouldroit ma hallebarde.  
 Ne feroit pas une bombarde.  
 Si ie me cuidoye deffendre.  
 Chascun se tienne sur sa garde.  
 Quant mort assaut il se fault rendre.

## LE MORT.

Que si dansez n'est que usage  
 Mon ami sot : bien vous advient  
 De y dânser comme plus sage  
 Tout homme danser y convient  
 L'escriure si m'en souvient  
 Dit en ung pas : qui bien l'entend  
 L'homme s'en vad point ne revient  
 Chascun chose a sa fin tend.

## LE SOT.

Or sont maintenant bons amis  
 Et dansent icy d'un accord :  
 Pleuseurs qui estoient ennemis  
 Quant ilz vuoient et en discord  
 Mais la mort les a mis d'acord  
 La quelle fait estre tout ung  
 Sages et sotz : quant Dieu l'acord  
 Tous mors sont d'un estat commun :





LE ROY MORT.

**T**ous qui en cette portraiture  
Veez danser estas divers  
Pensez que humaine nature  
Ce n'est fors que viande à vers,  
Je le monstre : qui gis enuers  
Si ay ie esté roy couronnez.  
Tel serez vous bons : et peruers.  
Tous estas : sont a vers donnés.

Bon y fait penser soir et main  
Le penser en est profitable.  
Tel est huy : qui mourra demain  
Car il n'est rien plus véritable  
Que de morir. ne moing estable  
Que vie d'homme. on la parçoit  
A l'eul. pour quoy n'est pas fable.  
Fol ne croit iusques il reçoit.

L'ACTEUR.

**R**ien n'est d'homme qui bien y pense  
C'est tout vent : chose transitoire.  
Chacun le voit : par ceste danse.  
Pour ce vous qui veez l'istoire  
Retenez la bien en mémoire.  
Car homme et femme elle amoneste :  
D'avoir de paradis la gloire :  
Eureux est qui es cieulx fait feste.

Mais aquns sont a qui n'en chault  
Comme si ne fut paradis  
Ne enfer. hélas : ils auront chault.  
Les liures que firent iadis.  
Les sains : le monstrent en beaux dis.  
Aquitez vous que cy passés :  
Et faites des biens : plus n'en dis  
Bienfait vault moult es trespasés.

*La grande Danse Macabre.*

uisque ainsi est que la mort soit certaine :  
 Plus que aultre rien terrible et douloureuse  
 Et que chose ne peult estre incertainne  
 Puisque en est l'heure horrible et angoisseuse  
 Et soit si briefue et partant périlleuse  
 Las nostre vie : en ceste vallée misérable.  
 Il m'est aduis pour le plus conuenable :  
 Que nous deuons du tout entièrement  
 Mectre soub pié ce monde décepuable.  
 Pour bien morir et viure longuement.



élessier doit toute ioye mondaine  
 Et mener vie humble et religieuse  
 Qui monter veult à la très souuerainne  
 Cité des cieulx, qui tant est glorieuse.  
 La contempler doit tousiours l'ame cureuse  
 Qui aime Dieu et hait euvre de diable  
 Suiure les bons estre a tous charitable  
 Soy confesser souvent déuotement.  
 Et messe ouir qui tant est profitable.  
 Pour bien mourir et viure longuement.



roup s'abuse homme qui demainne  
 Orgueil en luy et vie ambitieuse  
 Quant il seet bien que la mort tout emmainne  
 Qui vient souuent soudainne et merueilleuse.  
 Mais doit penser la passion piteuse  
 Du redempteur. et la peine doutable  
 D'enfer sans fin. qui est irréueccable.  
 Le iour hatif du diuin iugement.  
 Et ses péchés. comme saige et notable  
 Pour bien morir et viure longuement.



mortel homme : et ame roisonnable  
 Se après mort ne veulx estre dampnable  
 Tu dois le iour une fois seulement  
 Penser du moins ta fin abhominable  
 Pour bien morir et viure longuement.

*Cy finit la Danse Macabre des hommes.*


# *Sensuit la Danse Macabre* **DES FEMMES.**



## **L'ACTEUR.**

**M**irez vous icy mirez femmes  
Et mettez vostre affection  
A penser a vos pouures ames  
Qui désirent salvation.  
Cy bas, n'est pas la mansion  
Ou vous devez estre tousjours,  
Mort metz tout a destruction :  
Grant et petit meurt tous les jours.

Pour noblesse ne pour honneur  
Pour richesse. ou pouureté  
Pour estre dame de valeur  
Ou femme de mendicité  
Ne differé mort équité :  
Mais autant d'une part que d'autre  
Sans avoir mercy ni pité  
Huy prent l'une : et demain l'autre.



## LE PREMIER MÉNESTREL.

**V**enez dames et damoiselles  
 Du siècle et de religion  
 Veufues, mariées et pucelles  
 Et autres sans exception  
 De quelconque condition.  
 Toutes danser a ceste danse  
 Vous y venrez, veuillez ou non :  
 Qui sage est souuent y pense.

## LE SECOND.

Quoy sont voz corps, je vous demande  
 Femmes jolies tant bien parée  
 Ilz sont pour certain la viande  
 Q'un jour sera aux vers donnée.  
 Des vers sera donc devorée  
 Vostre char qui est fresche et tendre  
 Ia il n'en demourra goulée  
 Voz vers après deviendront cendre.

## LE TIERS.

Compaignon, bonne est ta raison  
 De ces femmes outrecuidée,  
 Que leurs corps sera venaison  
 De vers puans ung jour mengée.  
 En porroit elles estre gardée  
 Pour or. argent. ne rien qui soit :  
 Nenny. bien sont donques abusées  
 Qui ne s'amende il se décoit.

## LE QUART.

O femmes mirez vous en ung tas  
 D'ossemens de gens trespasés  
 Lesquelz ont en divers estas  
 Au monde esté leurs temps passés  
 Et maintenant sont entassés  
 L'un sur l'autre : gros. et menus.  
 Ainsi serés : or y pensés,  
 La char pourrie, les os tous nus.



LA MORTE.

LA MORTE.

**N**oble royne de beau coursage  
Gente et joyeuse a l'advenant  
J'ay de parle grant maistre charge  
De vous en mener maintenant  
Et comme bien chose advenant  
Ceste danse commencerez.  
Faictes deuoir au remenant  
Vous qui vivez ainsi ferez.

LA ROYNE.

Ceste danse m'est bien nouvelle  
Et en ay le cuer bien surprins  
Hée Dieu : quelle dure nouuelle  
A gens qui ne l'ont pas apprins  
Las en la mort est tout comprins  
Royne. dame. grant ou petite  
Les plus grans sont les premiers prins  
Contre la mort n'a point de fuyte.

Après madame la duchesse  
Vous vien quérir et pourchasser  
Ne pensez plus a la richesse  
A biens ne joyaulx amasser.  
Aujourd'uy vous fault trespasser  
Pour quoy de vostre vie est fait  
Folie est de tant embrasser.  
On n'emporte que le bienfait.

LA DUCHESSE.

Je n'ay pas encore trente ans  
Hélas : a leure que commence  
A savoir que c'est de bon temps  
Mort me vient tollir ma plaissance  
Jay des anis, et grant chevance  
Soulas. esbas. gens a deuis  
Pour quoy moingz me plaist c'est dance  
Gens aisés si meurent enuys.



LA MORTE.

LA MORTE.

**O** r ça ma dame la régente  
 Qui auez renom de bien dire  
 De danser. fringuer. estre gente  
 Sur toutes qu'on sauroit eslire.  
 Vous soliez autres faire rire  
 Festiez gens et raliér  
 Or il est temps de vous réduire.  
 La mort fait tretout oublier.

## LA RÉGENTE.

Quant me souuient des tabourins  
 Noces, festes, harpes, trompettes.  
 Menestrelx. doulcines. clarins :  
 Et des grans chères que jay faictes  
 Je congnoiz que telx entrefaictes  
 En temps de mort n'ont point de lieu  
 Mais tornent en pouures empleites  
 Tout se passe fors amer Dieu.

Gentille femme de chevallier  
 Que tant amez déduit de chasse  
 Les engins vous fault habiller  
 Et suiure le train de ma trasse  
 C'est bien chasser quant on pourchasse  
 Chose a son ame méritoire  
 Car au derrain mort tout enchasse :  
 Ceste vie est moult transitoire.

## LA FEMME DU CHEVALIER.

Pas si tost mourir ne cudoye  
 Et comment dea : je soupe hier  
 Sur l'erbe verte a la saulsoye  
 Ou fis mon espervier gayer.  
 En rien plus ne se fault fier  
 Et qu'est ce des fais de se monde  
 Huy rire demain lermoyer.  
 La fin de joye en deul redonde.



LA MORTE.

LA MORTE.

**B**ame abesse vous lesserez  
 Labbaye que auez bien amée.  
 Q'un peu des biens n'enporterez  
 Plus n'en serez dame appelée.  
 Vostre crosse d'argent dourée  
 Une de voz seurs auera  
 Qui après vous sera sacrée  
 Tout fut aultruy : tout y sera.

L'ABESSE.

Le seruice hier je fasoye  
 En l'église comme abesse  
 Et ma crosse d'argent portoye  
 A matines et à la messe  
 Et aujourd'uy fault que je lesse  
 Abbaye crosse et couuent  
 Hée Dieu : ce monde qu'est ce  
 On est de mort sourprins souuent.

Dame ployez voz gorgerettes  
 Il n'est plus temps de vous farder  
 Voz toretz, fronteaux, et bauetes,  
 Ne vous porroient icy aider.  
 Pleuseurs sont déceu par cuider  
 Que la mort pour leur habit flèche  
 Chascun il deust bien regarder :  
 Par habit mainte femme pêche.

LA FEMME DE L'ESCUYER.

Hée : qu'ay je meffait ou mesdit  
 Dont doye souffrir telle perte  
 Jauoye achetée au landit  
 Du drap pour taindre en ecarlète  
 Et eusse eu une robe verte  
 Au premier jour de l'an qui vient :  
 Mais mon emprins est descouuerte :  
 Tout ce qu'on pense pas n'auient.



LA MORTE.

LA MORTE.

**E** vous avez sans fiction  
 Tout vostre temps servir a Dieu  
 Du cueur : en la religion  
 Laquelle vous auoit vestue :  
 Celui qui tous biens retribue  
 Vous compensera loyalment  
 A son vouloir : en temps et lieu.  
 Bienfait, quiert auoir bon payment.

LA PRIEUSE.

Se estoit en ma religion  
 Seruir a Dieu tout mon desir :  
 En cloistre par deuotion  
 Dire mes heures a lésir.  
 Or m'est venue la mort sésir.  
 Au monde n'ay point de regré.  
 Face Dieu de moy son plésir.  
 Prandre doit on la mort en gré.

Venez après ma damoiselle  
 Et serrez tous voz affiquetz  
 N'en chault se estez layde ou belle  
 Cessez vous fault plait et quaquetz  
 Plus ne irés a ces bancquetz :  
 Ou sent si souef l'eau de rose  
 Ne verrez jouter a rouquetz.  
 Femmes font faire moult chose.

LA DAMOISELLE.

Que me valent mes grans atours  
 Mes habitz, jeunesse, beauté.  
 Quant tout me fault lessier en plours  
 Oultre mon gré et volenté.  
 Mon corps sera tantost porté  
 Aux vers et a la pourriture.  
 Plus n'en sera ballé ne chanté  
 Joye mondaine bien peu dure.





LA MORTE.

LA MORTE.

**L**t vous aussi gente bourgeoise  
 Pour néant vous excuserez  
 Il est force que chascun voise :  
 Comme véez et aduisez.  
 Vos beaux gorgias empésez  
 N'y font rien, ne large sainture  
 Maintz hommes en sont abusez  
 En tous estatz il fault mesure.

LA BOURGEOISE.

Femme vefue venez auant  
 Et uous auancez de venir  
 Vous veez les autres deuant  
 Il conuient une fois finir.  
 C'est belle chose de tenir  
 L'estat ou on est appelée  
 Et soy toujours bien maintenir :  
 Vertuz est tout par tout louée.

LA FEMME VEFUE.

Mes getz et colletz de létisse  
 Ne me exemptent point de mort  
 Mais mes grans joyes et delices.  
 Me viennent icy a remort.  
 Ma conscience fort me mord  
 Des folies faictes en jeunesse  
 Qui me sont a rebours très fort  
 Joye en la fin torne en tristesse.

Depuis que mon mari morut  
 J'ay eu des affaires granment  
 Si non : de Dieu gart seulement :  
 Sans que ame n'aye secourut  
 J'ay des enfans bien largement  
 Qui sont jeunes et non pourueus  
 Dont j'ay pité : mais nullement  
 Dieu ne lesse aucuns despourueus.



LA MORTE.

LA MORTE,

**M**llons oultre gente marchande  
 Et ne vous chaille de pésar  
 La marchandie qu'on demande :  
 C'est simplesse d'y plus muser.  
 A l'ame deussez aduiser.  
 Le temps s'en va heure après heure  
 Et n'est tel que d'en bien user.  
 Le merite et bienfait demeure.

LA MARCHANDE,

Qui gardera mon ouurouer  
 Tendis que je suis à mal aise :  
 Mes gens ne feront que jouer.  
 Les biens leur viennent a leur aise.  
 Adieu ma balance et ma chaise  
 Ou j'ay eu les yeulx diligens  
 Pour plus cher vendre dont me poise.  
 Auarice déçoit les gens.

Après ma dame la balliue  
 Des quaquetz tenus en l'église  
 Juger auez par raison viue  
 Maintes gens a vostre guise  
 Je vous signifie main mise  
 Pour pouuoir d'autre en voz lieu,  
 Car aujourd'hui serez desmise.  
 Point ne se fault jouer à Dieu.

LA BALLIUE.

Que femme se plaint de léger  
 La costume n'est pas nouuelle :  
 Que s'entremecte de juger  
 Des fais d'aucruy et non pas d'elle  
 Chascune se répute telle  
 Que ce quelle fait est bien fait.  
 Qu'oncques mal ne fut dit par elle.  
 Il n'est rien au monde parfait.



LA MORTE.

LA MORTE.

**P**our vous monstrier vostre folie  
Et qu'on doit sur la mort veiller:  
Ça la main espousée jolie  
Allons nous en deshabiller.  
Pour vous ne fault plus traueiller  
Car vous viendrez coucher ailleux  
On ne se doit trop resueiller.  
Les fais de Dieu sont merueilleux.

L'ESPOUSÉE.

En la journée qu'auoye désir  
D'auoir quelque joye en ma vie:  
Je n'ay que deul et desplaisir  
Et si faut que tantost deue.  
Hée mort: pour quoy as tu enuie  
De moy: qui me prent si a coup.  
Si grant faulte n'ay deseruie.  
Mais il fault louer Dieu de tout.

Femme nourrie en mignotise  
Qui dormez jusques au disner  
On va chauffer vostre chemise  
Il est temps de vous desjeuner.  
Vous ne deussez jamais jeuner  
Car vous estez trop maigre et vuide  
A demain vous viens adjourner:  
On meurt plus tost que on ne cuyde.

LA FEMME MIGNOTE.

Pour Dieu qu'on me voise quérir  
Médecin ou appoticaire.  
Et comment: il me fault morir  
J'ay mary de si bon affaire.  
Aneaulx. robes. ix. ou dix paires.  
Ce morceau cy m'est trop aigret  
Moult se passe tost vaine gloire.  
Femme en ses saulx meurt a regret.



LA MORTE.

**B**ouice fille et belle pucelle  
 Ne vous chaille ja de lessier  
 La misère de vie mortelle  
 Qui convient à chascun passer.  
 Car qui voudroit bien tout trasser  
 Il na seurté n'arrest en lieu  
 Fort son sauvement pourchasser.  
 Virginité plait bien a Dieu.

## LA PUCELLE VIERGE.

En ce siècle jeunes ne vieulx  
 Ne sont pas en grant seurté  
 De larmes sont souuent les yeulx  
 Plains pour ennuy. ou pouureté.  
 Se on a une joyeuseté  
 Il vient après quinze douleurs  
 Pour ung bien : double aduersité.  
 Plaisir mondain finit en pleurs.

LA MORTE.

Nous direz vous rien de nouveau.  
 Ma dame la théologienne,  
 Du testament vieulx ou nouveau.  
 Vous véez comme je vous menne  
 Et estez ja fort ancienne  
 Il fait bon cecy reconnoistre  
 Et à bien morir mettre paine.  
 C'est beaucop que de se congnoistre.

## LA THÉOLOGIEENNE.

Femme qui de clergie respond  
 Pour auoir bruit ou qu'on l'escoute  
 Et des morues du petit pont  
 Qui ont grans yeulx et ne voyent goute  
 Sage est qui rondement si boute  
 Et qui trop veult sauoir : est bugle  
 Le hault monter souuent cher couste.  
 Chascun en son fait est aueugle.



LA MORTE.

LA MORTE.

**A** près : nouvelle mariée  
 Qui auez mis vostre désir  
 A danser, et estre parée  
 Pour festes et nopces choisir.  
 En dansant je vous viens saisir  
 Aujourd'huy serez mise en terre.  
 Mort ne vient jamais à plaisir  
 Joye s'en va comme feu de ferre.

LA NOUVELLE MARIÉE.

Las : demy an entier n'a pas  
 Que commence a tenir mesnage  
 Par quoy si tost passer le pas  
 Ne m'est pas doulceur. mais rage.  
 J'auoye désir en mariage  
 De faire et mons et merueilles.  
 Mais la mort de trop près me charge  
 Ung peu de vent abat grans feuilles.

Femme grosse prenez loisir  
 D'entendre à vous légèrement  
 Car huy mourez. c'est le plaisir  
 De Dieu et son commandement.  
 Allons pas a pas bellement  
 En getant vostre cueur es cieulx  
 Et n'ayez peur aucunement :  
 Dieu ne fait rien que pour le mieux.

LA FEMME GROSSE.

J'auray bien petit de déduit  
 De mon premier enfantement  
 Si recommande a Dieu le fruit  
 Et mon ame pareillement.  
 Hélas. bien cuidoye aultrement  
 Avoir grant joye en ma gésine  
 Mais tout va bien piteusement :  
 Fortune tost se change et fine.



LA MORTE.

LA MORTE.

**D**icez, jeune femme à la cruche  
 Renommée bonne chambériere  
 Respondez au moins quant on huche  
 Sans tenir si rude manière.  
 Vous n'irez plus a la ruiere  
 Bauer. au four n'a la fenestre  
 C'est ci vostre journée dernière :  
 Aussi tost meurt seruant que maistre.

LA CHAMBERIERE.

Quoi ma maistresse ma promis  
 Me marier et des biens faire  
 Et puis si ay d'autres amis  
 Qui lui aideront à parfaire :  
 Héé m'en iray je sans rien faire  
 J'en appelle. on me fait tort  
 Aussi ne m'en scauroye je taire  
 Peu de gens désirent la mort.

Scauez vous recommandresse  
 Point ung bon lieu pour moy loger  
 J'ay bien mestier que on m'adresse  
 Car nul ne me veult héberger.  
 Mais j'en feray tant desloger  
 Que on cognoistra mon enseigne  
 Mourir fault pour vous abrèger :  
 Nul ne pert que autre ne gaigne.

LA RECOMMANDERESSE.

En la mort n'a point de amité  
 Et si ne fait riens pour requeste  
 Or. argent. prière. pité  
 Pour néant on s'en rompt la teste  
 Qui y veult résister est besto  
 La mort a nulluy ne complaist  
 Et fault tous danser à sa feste :  
 Mourir conuient quant a dicu plaist.





LA MORTE.

LA MORTE.

**M**a demoiselle du bon temps  
 A tout voz anciens atours  
 Il est de vous en venir temps  
 Nature a en vous pris son cours.  
 Vous ne pouuez viure tousjours  
 Je voy deuant, venez après  
 Et ne faictes point longz séjours :  
 Vieilles gens sont de la mort près.

LA VIEILLE DEMOISELLE.

J'ai voirement mon temps passé  
 Et ayme mieulx ainsi mourir  
 Que reuoir ce qui est passé  
 Et tant de misères courir.  
 J'ay veu pouures gens langourir  
 Et autres choses dont me tais :  
 Enfans. pour bien viure et morir  
 Il n'est plus grant bien que de pais.

Femme de grant dévotion  
 Cloez voz heures et matines  
 Et cessez contemplation  
 Car jamais n'yres a matines.  
 So voz prières sont bien dignes  
 Elles vous vaudront deuant Dieu,  
 Rien ne vaillent souppirs ne signes :  
 Bonne opération tient lieu.

LA CORDELIÈRE.

Je remercie le créateur  
 A qui plaist de m'enuoyer querre  
 En louant le bon rédempteur  
 Des biens quil ma donné sur terre.  
 Aux temptacions ay eu guerre  
 Qui est moult forte à demener  
 Mais il aide qui veult requerre  
 Servir Dieu : est viure et régner.



## LA MORTE.

**M**emme d'accueil et amiable  
 A festier gens a planté  
 Acquis auez amis de table  
 Pour parler de joyeuseté  
 Le temps n'est tel quil a esté  
 Rien ne vault icy vacabont  
 Parler. qui n'est que vanité :  
 Ceulx qui ont le bruit ont le bont.

## LA FEMME D'ACCUEIL.

Aujourd'hui parens et amys  
 Promectent et mons et merueilles  
 Mais quant voyent qu'on est bas mis  
 Ils baissent trotous les oreilles  
 Et sont aussi sours comme fueilles  
 Que le vent fait voler par couples  
 Et que vallent promesses telles :  
 Vrais ne sont pas les amis doubles.

## LA MORTE.

Après nourrice. vostre beau filz  
 Nonobstant son couuertouer  
 Et son beau bonnet a trois filz  
 Vous ne le menrez plus jouer  
 Deslogez vous sans delayer.  
 Car tous deux vous mourrés ensemble  
 Vous ne pouuez plus cy targer :  
 La mort prent tout quant bon ly semble.

## LA NOURRICE.

A ceste danse fault aller  
 Comme font les prestres au seyne :  
 Je voulsisse bien reculler  
 Mais je me sens la boce en layne.  
 Entre les bras. de mon alaine  
 Cest enfant meurt d'espiedemie  
 C'est grant pité de mort soudaine :  
 Il n'est qui ait heure ne demie.





LA MORTE.

LA MORTE.

**LA MORTE.**  
 as ne vous obliera derrièr  
 Venez apres moy. ça la main  
 Entendez plaisante bergière  
 On marchande cy main a main.  
 Aux champs n'irez plus soir ne main  
 Veiller brebis ne garder bestes  
 Rien ne sera de vous demain :  
 Après les veilles sont les festes.

Après, pouure vielle aux potences  
 Qui ne vous pouez soustenir :  
 Cy bas n'auez pas voz plaisances  
 Aussi vous en convient venir.  
 L'autre siècle est a aduenir  
 Ou pour vostre mal et misère  
 Pouuez a grant bien paruenir :  
 Dieu recompense tout en gloire.

LA BERGIÈRE.

LA FEMME AUX POTENCES.

Je prens congé du franc gontier  
 Que je regrette a merveilles  
 Plus n'aura chapeau déglantier  
 Car vecy piteuses nouuelles.  
 Adieu bergiers et pastourelles  
 Et les beaux champs que Dieu fit croistre :  
 Adieu fleurs et roses vermeilles  
 Il fault tous obeir au maistre.

De viellesse ne voy mais goutte  
 Par quoy ne crains guères la mort  
 Dix ans y a que j'ay la goutte  
 Et maladie me grefue fort.  
 Mes amis ont le mien à tort  
 Et n'ay vaillant deux blancs contans  
 Dieu seul est tout mon reconfort :  
 Après la pluye vient le beau temps.



LA MORTE.

**H**a pouure femme de village  
 Suiuez mon train sans retarder  
 Plus ne uendrez euf ne fromage  
 Allez vostre panier vuidier.  
 Se vous avez bien sceu garder  
 Pouureté. pacience et perte  
 Vous en pourrez moult amender :  
 Chascun trouuera sa deserte.

## LA FEMME DE VILLAGE.

Je prends la mort vaille que vaille  
 Bien en gré et en pacience  
 Francs archiers ont pris ma poullaille  
 Et eu toute ma substance.  
 De pouures gens nulluy n'en pense  
 Entre voisins n'a charité  
 Chascun veult auoir grant cheuance :  
 Nul n'a cure de pouureté.

LA MORTE.

Et vous, ma dame la gourrée  
 Vendu auez maintz beaux surplis  
 Donc de l'argent estes fourrée  
 Et en sont voz coffres remplis.  
 Après tous souhaitz accomplis  
 Conuient tout lessen, et bailler,  
 Selon la robe on fait le plis :  
 A tel potage tel cuiller.

## LA VIELLE.

A tout mon cas bien reconnoistre  
 Je n'ay pas vescu sans reprouche  
 Me suis affublé de mon maistre  
 Comme fait coquin de sa poche.  
 J'ay souuent mis ses vins en broche  
 Et l'ay fait despendre a ma guise  
 Mais maintenant la mort m'aprophe :  
 Tant va le pot a l'eau qu'il brise.



LA MORTE.

LA MORTE.



pprochez vous revenderesse  
Sans plus cy faire demourée  
Vostre corps nuit et jour ne cesse  
De gagner pour estre honnorée.  
Honneur est de pouure durée  
Et se pert en ung moment. d'eure  
Au monde na chose assurée :  
Tel rit au main au soir pleure.

LA REVENDERESSE.

J'auoye hier gaigné deux escus  
Pour forfaire subtilement  
Mais ne scay que sont deuenus :  
Argent acquis mauuaiseement  
Ne fait ja bien communement.  
Hélas je meurs, c'est d'aulture metz  
Que prestre aye hastiuement :  
Il me vault mieulx tard que jamais.

Femme de petite value  
Mal viuant en charnalité  
Mené auez vie dissolue  
En tous temps yver et esté.  
Aiés le cueur espouuenté  
Car vous serés de près tenue  
Pour mal faire on est tormenté  
Péché nuist quant on continue.


LA FEMME AMOUREUSE.

A ce péché me suis soubzmise  
Pour plaisance désordonnée.  
Pendus soient ceulx qui m'y ont mise  
Et au mestier habandonnée.  
Las si j'eusse esté bien menée  
Et conduite premièrement  
Jamais n'y eusse esté tournée  
La fin suit le commencement.



LA MORTE.

LA MORTE.

enez ça, garde d'acouchées  
Dressé auez maints baingz perdus  
Et ces cortines attachées  
Ou estoit beaux boucquès pendus.  
Biens y ont estez despendus  
Tant de motz ditz que c'est ung songe  
Qui seront après cher vendus :  
En la fin tout mal vient en ronge.

## LA GARDE D'ACOUCHÉES.

J'ay voyrement dressé maintz baingz  
Pour les compères et commères  
Ou sont esté pastes de coings  
Mengés. darioles. goyères  
Tartes. et fait mille grans chères.  
Si tost qu'on a osté la table  
Il n'en souvient a nulluy guères :  
Joye de menger est peu durable.

Virez vous près. gente garsette  
Baillez moy vostre bras menu  
Il faut que sur vous la main mette  
Vostre derrain jour est venu.  
Mort n'espargne gros ne menu  
Grant ou petit luy est tout ung  
Payer on doit de tant tenu :  
La mort est commune à chascun.

## LA JEUNE FILLE.

Haa. ma mère je suis happée  
Vécý la mort qui me transporte  
Pour Dieu qu'on garde ma poupée  
Mes cinq pierres. ma belle cote.  
Ou elle vient trestout emporté  
Par le pouoir que Dieu ly donne  
Vieux et jeunes de toute sorte :  
Tout vient de Dieu tout y retorne.



LA MORTE.

LA MORTE.

**LA RELIGIEUSE.**  
 uiuez mon train religieuse  
 De vos fais conuient rendre compte  
 Se point n'auéz esté piteuse  
 Aux pouures, ce vous sera honte.  
 En paradis point on ne monte  
 Fors par degréz de charité  
 Entendez bien a vostre compte :  
 Tout ce qu'on fait y est compté.

Oyez oyez, on vous fait assauoir  
 Que ceste vielle sorcière  
 A fait morir et decepuoir  
 Pleuseurs gens en mainte manière.  
 Est condamnée comme meurtrière  
 A morir, ne viura plus gaire  
 Je la maine en son cymitière :  
 C'est belle chose de bien faire.

LA RELIGIEUSE.

LA SORCIERE.

J'ay fait par tout ce que j'ay peu  
 Aux pouures selon leur venue  
 Les malades pensé et repeu  
 Non si bien que j'estoye tenue.  
 Mais se faulte il est aduenue  
 Dieu me pardonne la défaille  
 Sa grâce toujours retenue :  
 Il n'est si juste qui ne faille.

Mes bonnes gens ayez pité  
 De moy et toute pécheresse  
 Et me donner par amité  
 Don de patenostre ou de messe.  
 J'ay fait du mal en ma jeunesse  
 Dont icy achete la prune  
 Si priez Dieu que l'ame adresse  
 Nul ne peult contre sa fortune.



LA MORTE.

**D**ieu ayme bien femmes dévotes  
 Qui ont consciences nettes.  
 Et hait surtout ces bigotes  
 Aux chaperons sans cornètes  
 Comme aucunes seurs collettes  
 Lesquelles par ypocrisie  
 En secretz péchez sont infectes  
 Deuant Dieu et sa compaignie.

## LA BIGOTE.

Pour verité me suis monstrée  
 Souuent meilleur que je nestoye  
 Aucunes fois bien desjeunée  
 Faisant semblant que je jeunoye.  
 Et de ma bouche barbetoye  
 Sans dire ne mot ne lettre :  
 Je pry a Dieu qu'en bonne voye  
 Plaise ma pauvre ame mettre.

LA MORTE.

Sus tost, margot venez auant  
 Estes vous maintenant derriere  
 Vous deussiez ja estre deuant  
 Et danser toute la première.  
 Quel contenance, quel manière  
 Ou est vostre fille marote  
 Ne vault faire cy mesgre chière  
 Car c'est vostre dernière note.

## LA SOTTE.

Entre vous cointes et jolies  
 Femmes oyez que je vous dis  
 Laissez a heure voz folies  
 Car vous mourrez sans contredis.  
 Si j'ay ne meffait ne mesdis  
 A ceulx qui demeurent, pardon  
 Requiers, et à Dieu paradis :  
 Demander ne puis plus beau don.





LA ROYNE MORTE:

**E** estoye royne couronnée  
 Plus que autre doubtée et crainte  
 Qui suis ici aux vers donnée  
 Après que de mort fuz actainte  
 Sur la terre je suis contrainte  
 D'estre couchée a la renuerse :  
 Pour quoy est dure ma complainte :  
 Bien charie droit qui ne verse.

Prenez y qui me regardez  
 Exemple pour vostre prouffit  
 Et de mal faire vous garde  
 Je n'en dis plus, il me souffit  
 Si non. car celui qui vous fit  
 Quant il voudra vous deffera.  
 Deffais estiez quant vous refit  
 Qui bien fera bien trouvera.





## L'ACTEUR.



vous seigneurs, et aussi dames,  
 Qui contemplez ceste paincture :  
 Plaise vous prier pour les ames,  
 De ceulx qui sont en sépulture.  
 De mort n'eschappe créature  
 Allez, venez. après mourrés.  
 Ceste vie q'un bien peu ne dure :  
 Faictes bien vous le trouuerés.

Jadis furent comme vous estes,  
 Qui ainsi dansent en façon telle  
 Allans. parlans. comme vous faictes  
 De gens mors il n'est plus nouuelle.  
 Ne il n'en chault d'une cenelle  
 Aux hoirs, ne amis des trépassés :  
 Mais qu'ilz ayent argent et vaiselle  
 Ayez d'eulx pité. c'est assés.



Puisque ainsi est qu'il nous fault tous finir  
Et après fin compte a Dieu du tout rendre  
Las. désormais vueillons nous maintenir  
Si saintement. sans tache et sans mesprendre  
Que a l'eure horrible ou mort nousouldra prendre,  
Nostre pouure ame a présent vicieuse  
Soit des vertus tant riche et précieuse,  
Que voler puisse en la clère cité  
Ou est plaisir. joye et félicité  
Salut. vertus. aussi paix pardurable,  
Vie sans mort. beauté. santé. jeunesse,  
Los pieu. pouvoir et force insupérable  
Qui tousjours dure et qui jamais ne cesse.

Las nous voyons tous les jours mort venir  
Qui est la fin que nous debuons actendre,  
Et ne sauons que peuuent deuenir  
Les esperitz, quant-les corps sont en cendre,  
Les bons vont sus. les mauuais fault descendre  
En une chartre obscure et tenebreuse,  
Ou est vermine immortelle, angoisseuse,  
Misère. ennui. faulte et nécessité  
Faim. soif. pleur. cry et toute aduersité  
Horreur. peur. fraieur inénarrable  
Mort sans mourir. désespoir et tristesse,  
Feu sans lumière et froit intolérable,  
Qui tousjours dure et qui jamais ne cesse.

Hélas pour tant vueillons bien retenir,  
Tous ces pions cy et a bien faire entendre  
Si que après mort, nous puissions peruenir  
Ou hault royaume ou nous deuons tous tendre;  
Qui tant riche est que cuer ne peut comprendre  
On y vit en paix. qu'est chose glorieuse  
Et oyt on son de voix si mélodieuse  
La ont les corps impassibilité  
Agilité. clarté. subtilité;  
Et les ames sapience admirable,  
Puissance. honneur. seureté et liesse;  
Concorde. amour en gloire inséparable  
Qui tousjours dure et qui jamais ne cesse.

O mouuais riche enflé de iniquité  
Rude aux pouures. las que ta prouffité  
Ton riche habit. ta plantureuse table  
Puis que tu es pouure, pour ta richesse,  
Et as soif ores, et faim insaciable;  
Qui tousjours dure et qui jamais ne cesse.


Je congnois que Dieu ma formé,  
Et fait en sa digne semblance;  
Je congnois que Dieu ma donné,  
Ame sans vie, et congnoissance,  
Je congnois que juste balance,  
Selon mes fais jugé seray,  
Je congnois moult. mais je ne scay  
Congnoistre dont vient la folie,  
Que je scay bien que je mourray,  
Et si n'amende point ma vie.

Je congnois en quel pouureté  
Vins sur la terre, et nasqui d'enfence,  
Je congnois que Dieu ma presté  
Tant de biens, en grant habondance,  
Je congnois qu'auoir ne cheuance,  
Aueques moy n'emporteray;  
Je congnois que tant plus auray,  
Plus dolent mourray en partie,  
Je congnois tout cecy pour vray,  
Et si n'amende point ma vie.

Je congnois que j'ay ja' passé,  
Grant part de mes jours sans doubance,  
Je congnois que j'ay amassé  
Péché, et fait peu pénitence,  
Je congnois que par ignorance,  
Excuser je ne me pourray;  
Je congnois que trop tard veudray  
Quant l'ame sera départie,  
Pour dire je m'amenderay:  
Et si n'amende point ma vie.

Prince, je suis en grant esmay,  
De moy qui les autres chatie,  
Et moy mesmes le pire fay,  
Et si n'amende pas ma vie.



ur ce cheual hideux et palle,  
 La mort suis : fièrement assise  
 Il n'est beauté que je ne haale,  
 Soit vermeille, ou blanche, ou bise,  
 Mon cheual court comme la bise,  
 Et en courant mort, rua, et frappe,  
 Et je tue tout car c'est ma guise,  
 Tous viuans trébuchent en ma trappe.

Enfer sçait bien quel tuerie  
 Je fais de gens. car pas à pas,  
 Me suit : et de ma boucherie,  
 Aual l'an fais maint gros repas.  
 Quant je besoigne, il ne dort pas ;  
 Par moy attend que proie aura,  
 D'aucuns qui ne s'en doubtent pas,  
 Sen garder qui garde voudra.

Je passe par mons, et par vaux,  
 Sans tenir ne voie ne sente,  
 Je prens par villes, et chasteaulx,  
 Mon tribu, mon cens et ma rente,  
 Sans donner délay. n'attente,  
 Ne jour. ny heure. ne demie.  
 Deuant moy fault qu'on se présente  
 A tous viuans je tolz la vie.

Encor ne sçay raison pour quoy,  
 De ceulx qui meurent de mon dart,  
 Et sont sans nombre : crois moy  
 Car il en a la plus grant part.  
 Paradis n'en a mie le quart,  
 Ne la dime. on lui feroit tort.  
 Grant, s'il n'auoit tout au plus tart  
 L'homme pescheur quant il est mort.

Je considère ma pouure humanité.  
Et comme en pleur premier nasqui sur terre,  
Je considère moult ma fragilité  
Et mon péché qui tropt le cuer me serre.  
Je considère que mort me viendra querre  
Je ne sçay l'heure pour me tollir la vie.  
Je considère que l'eunemy m'espie.  
La char, le monde, me guerroient si treffort  
Je considère que c'est tout par enuie  
Pour moy liurer sans fin de mort à mort.


Je considère les tribulations  
De ce vil siècle dont la vie n'est pas necte.  
Je considère cent mille passions,  
Ou pouure humaine créature, est subjecte,  
Je considère la sentence parfaicte  
Du vrai juge, faicte sur bons et maulx,  
Je considère tant plus viz, que pis vaulx,  
Dont conscience bien souuent me remort.

Je considère des dames les deffaulx  
Qui sont liurés sans fin de mort à mort.  
Je considère que les vers mangeront  
Mon dolent corps, c'est chose espouuentable,  
Je considère, las, pécheurs que feront  
Quant se viendra le jugement doutable,  
O douce vierge, sur toutes délectable  
Ayez mercy de moy celle journée  
Qui tant sera merueilleuse et doubteé,  
Et ma pouure ame conduisez a droit port.  
Car a vous seule de cuer je lay vouée  
Pour la deffendre sans fin de mort a mort.

Prince du ciel vostre humble créature  
Vous cry mercy, pour faire son accord  
Et de la peine qui a tousjours, mais dure  
La deffendez sans fin de mort a mort.

*Cy finist la Danse Macabre des Femmes.*





*S'ensuivent les dis des trois mors, et trois vifz; et doit on  
premièrement lire le proesme de l'ermite.*

## *L'ERMITE.*

**O**uvre tes yeux créature chétive,  
Viens veoir les fais de la mort excessive,  
De qui j'ai eu en ce lieu vision,  
Pensée n'est si très contemplative,  
Que d'avoir eu une heure hastiue,  
Ung tel regard n'eust admiration,  
De trois corps mors m'est l'apparition  
Venue icy, avecques leurs suaires,  
Pareillement leurs terribles viaires,  
Deffigurés et leurs corps descouverts,  
Les trous des yeux et du nez ouuers,  
Les os tous secz. jambes. bras. pieds et mains  
Tous demangiés et partuaisés de vers,  
C'est le tribut que mort doit aux humains.

Terrible mort sur tous autres terribles,  
On te voit bien par tes eures horribles  
Dire et clamer puis que par sa morsure  
Et par assauls, soudains imperceptibles,  
Par coups mortelz divers, irremissibles,  
Telle tu fais humaine créature.  
De tes eures ai veu la pourtraicture;  
Tant diuerse. tant cruelle et hideuse  
Deffigurée. horrible. merveilleuse,  
Deuant mes yeux en ce poure hermitage.  
Qui m'ont troublé tellement le corage  
Que plus ne peut de tel eure cognoistre,  
Bien doit penser à la mort qui est sage,  
Car en la fin il nous conuient telz estre.

Or ne scet on si trois autrefois  
 Ont esté ducs. barons. contes ou roys;  
 Papes. abbés. cardinaux ou chanoines,  
 Ne qui estoit le plus noble des trois,  
 S'ilz ont esté bossus, borgnes, ou drois;  
 S'ilz ont esté preuosts, ou capitaines,  
 Fors qu'ilz ont eu tous trois faces humaines. Qui ont esté en la terre ammurées  
 La ou les vers les ont défigurées,  
 Si qu'il n'y a plus rien que l'ossement  
 Qui est a tous grant esbahissement,  
 Et est bien fol a qui point n'en souient  
 Grans et petis uniuersellement.  
 Une fois telz estre nous couient.



De l'autre part sont venus vis à vis  
 Sur trois cheuaux. trois biaux hommes vis.  
 Mais en voyant ceste chose admirable  
 Il a semblé qu'ilz ont esté ravis  
 Trop long seroit à conter le deuïs  
 Des trois viuens piteux et lamentable.  
 Celui n'eut d'eux qui ne fust doubtable  
 De veoir les mors et non pas sans raison  
 Car quiconque voit feu en la maison  
 De son voisin, prochain mettre et getter  
 De la sienne par cause doit doubter.  
 Dont les viuans que les mors aperçurent  
 Merueille n'est si de fort s'espouuanter  
 A celle heure; cause raisonnable eurent.

Les mors aux vis les vis aux mors parlèrent  
 Et aux viuens les trois morts réuellèrent  
 De mort les grans et terribles assaulx.  
 Et tellement les viuens espoentèrent  
 Que a bien petit que tous ne trebuchèrent  
 A la terre de dessus leurs cheuaulx.  
 L'ung laissa chiens et l'autre ses oyseaulx  
 En requérant à Dieu grace et mercy.  
 Que requérir nous lui deuons aussi  
 En lui priant par la sainete puissance  
 Qu'il nous donne faire vray penitance.  
 Si qu'au monde que nous somes mortelz  
 Nous facons tant qu'ayons la jouissance  
 Après la mort des règnes immortelz.

## LE PREMIER MORT.

Se nous vous aportons nouvelles  
 Qui ne soient bonnes ou belles :  
 A plaisance ou a desplaisance  
 Prendre vous fault en pacience  
 Car estre ne peut autrement.  
 Beaux amis tout premièrement  
 Non obstant quelconque richesse  
 Puissance, honneur, force ou jeunesse :  
 Nous vous denonçons tout de voir  
 Qu'il vous conuient mort recepuoir  
 Onc mort las, si douloureuse  
 Si amère, si angoisseuse  
 Que les mors qui en sont deliure  
 Ne voudroient jamais reuiure  
 Pour mourir encor de tel mort.  
 En après quant vous serés mort  
 Tout ainsi que pouures truans  
 Vous serés hydeux et puans.  
 Des nostres, et de nos liurées,  
 Et vos âmes seront liurées  
 Je n'en dis plus mais, c'est du pire.  
 Il me souffrist assez de dire  
 De vos meschans corps la misère  
 Qui ne sont pas d'autre matère,  
 Saichés le de vray que nous sommes :  
 Na guere estions puissans hommes  
 Or sommes telz com nous veez  
 Se vous voulés cy pourvééz,  
 Et bien y deuez pourueoir,  
 Quant en nous vous puez veoir  
 Comme de vous il aduiendra  
 Et quel loyer mort vous rendra.  
 Car vos corps qui sont plains d'ordure  
 Aller fera a pourriture.  
 Telz comme vous un temps nous fumes  
 Telz serez vous comme nous sommes.

## LE SECOND MORT.

Pournééz y se vous voulez,  
 Autrement que vous ne soulez.  
 Car certes la mort vous espie  
 Pour vous oster du corps la vie  
 Plus briefment que vous ne cuidez,  
 Qui estes sy oultreuidez  
 Que pour ung pou de ioye vaine  
 Ung pou de plaisance mondaine  
 Qui est de si courte durée  
 Tost venue et plus tost allée.  
 Voulez perdre la joye fine  
 De paradis qui point ne fine :  
 Et qui pis est dampnés serés  
 Aultrement n'en eschapperés  
 Mais ce sera sans déliurance.  
 Comment auez vous tel plaisance  
 Dictes moy, meschans orgueilleux  
 En ce monde si périlleux  
 Ou il n'a que diuisions.  
 Diuerses tribulacions.  
 Puis guerre, puis mortalité.  
 Tousjours nouvelle aduersité  
 Renient auant que l'autre faille :  
 Vous ne sauez homme sans faille  
 Tant soit puissant veulle ou ne veulle  
 Qui ne seuffre et qui ne se deulle :  
 Ailleurs doncques repos querés  
 Car cy point ne le trouuerés.  
 Repos auez en paradis.  
 Se croire vous voulez les dis  
 Des saiges, qui conseillent faire  
 Ce que faire est nécessaire  
 Pour l'acquérir et pour l'auoir.  
 Bien milleur nul ne peult auoir.  
 Faictes des biens plus que pourrés  
 Autre chose n'emporterés.

*LE TIERS MORT.*

O folle gent mal aduisée  
 Que je voy ainsi desguisée.  
 De diuers habitz et de robes  
 Et d'autres choses que tu robes.  
 Ta puante charongne a vers  
 Et prens de tort et de trauers.  
 Ne il ne te chault dont ce viengne.  
 Fors que ton estat se maintiegne.  
 Quant je congnois tes faulx délitz  
 Les grans excès les grans oultrages  
 Dont ceux qui font les labourages  
 Aux champs et pour toy se travaillent.  
 Tous nuz, de fain crient et baillent  
 Quant je voy tel gouuernement.  
 Je doute que soudainement  
 Telle vengeance ne s'en face.  
 Que tu n'auras ne temps n'espace  
 Seulement de crier mercy.  
 Cuydés vous tousjours régner cy.  
 Folz meschans de male heure nez  
 Qui en tel point vous démenez.  
 Nennil, nennil, vous y mourrez.  
 Faictes du pis que vous pourrez  
 Lors aurez pardurable vie.  
 Bonne ou male n'en doutez mie :  
 Dieu est justes il paiera  
 Selon ce que chascun fera.  
 Faictes des biens n'atendez pas  
 Que ceulx après vostre trespas  
 Pour vous en facent quauiés chier.  
 Qui ne vous vouldroit approchier.  
 En la terre vous porteront  
 Et tost après vous obliront.  
 Et telz cuidez vos bons amis  
 Qui sont vos plus grans ennemis.

*LE PREMIER VIF.*

O sainte croix par ta puissance  
 Dont je voy cy la remembrance.  
 Garde mon corps et ne consens  
 Que je perde aujourduy mon sens  
 Pour ceste gent hydeuse et morte  
 Qui telz nouuelle nous apporte.  
 Nouuelles dures et peruerses  
 Las. entre les choses diuerses  
 Touchans notre fragilité.  
 De quoy nous ont dit verité.  
 Mon poure cuer de paour tremble.  
 Quant trois mors ainsi vont ensemble  
 Deffigurés, hydeux, diuers  
 Tous pourris, et mengés de uers.  
 Le premier dit : bien m'en souuient  
 Que mort recevoir nous conuient.  
 A grant angoisse et grant douleur  
 Dont il me fist muer couleur.  
 Et des ames dist une chose  
 Que d'éclairer ne veult ne n'ose  
 Je croy c'est de leur dampnement  
 En enfer pardurablement,  
 Telz nouuelles ne sont pas bonnes.  
 Lassés nous, chétiues personnes  
 Pour quoy nous fist onquez Dieu nestre  
 En ce méchant monde pour estre  
 Si tost liurez a tel ordure.  
 De ma vie n'ay jamais cure  
 Car je voy que les gens qui uiuent  
 Tant de maleurté ensuiuent,  
 Que je prise trop mieulx d'assez  
 Le pouure estat des tréspassez,  
 Car tousjours sans fin durera  
 Ou celuy des vifz finera.  
 Et en l'estat que tousjours dure  
 Chascun viure doit mettre cure.

## LE SECOND VIF.

Est-ce donc a bon escient  
 Que la mort nous va espiant  
 Et qui nous fault ainsi morir.  
 N'est il homme qui secourir  
 En puist pour or ne pour argent.  
 Hélas conuient il jeune gent  
 A tel horribleté venir  
 Onc mes ne m'en peult souuenir  
 Mais je voy bien que c'est a certes  
 Je voy les enseignes apertes.  
 De mort passerons les destrois  
 Et deuenrons comme ces trois  
 C'est la fin de nostre besogne.  
 Hélas, hélas meschant charongne  
 Mais que tu faces tes plaisirs  
 Tes volontés, tes faulx désirs  
 Il ne te chault du remenant.  
 Or veons nous bien maintenant  
 Que par toy sommes deceu  
 Qui jusques cy te auons creu :  
 Car de nos ames pou te chault  
 Selles auront ou froit ou chault :  
 Fy, charongne qui rien ne vaulx.  
 Tu aymes mieulx les grans cheuaulx  
 Les beaux habits si pou durables :  
 Et telles choses corrumptibles  
 Pour ton mauuez corps et rebelle  
 Que tu ne fais une amo belle.  
 Et si scez bien que tu mourras  
 Et en la terre pourriras.  
 Ou l'ame pardurablement  
 Viura en joye ou en torment.  
 Pensons doncques si bien finer  
 Qu'en joye nous puissions régner.  
 Bon y fait penser quant on peult  
 Souuent on ne pense quant on veult.

## LE TIERS VIF.

Certes c'est bien dit, mais au fort  
 Il n'y a point de desconfort  
 Tous nous conuient passer ce pas  
 Et croy que Dieu ne nous hait pas.  
 Mes beaux seigneurs et beaux amis  
 Quant ces trois mors nous a transmis.  
 Qui donné nous ont congnoissance  
 De la mort et de la meschance.  
 Qui nous vient finer nostre joye  
 Hélas jamais je ne cuydoie  
 Que ce temps cy nous deust faillir.  
 Ne que mort osast assaillir  
 Telz gentilz gens comme nous sommes,  
 Mais je voy bien que riches hommes  
 Sont telz et de nulle value  
 Ne plus ne mains que gent menue.  
 N'en parlons plus, c'est tout néant  
 Maintenant je suy cleruéant :  
 Que la joye du monde est briefue  
 Et la fin d'elle point et griefue  
 En enfer est horrible paine.  
 En paradis à joye plaine.  
 Sur toutes joyes délitabile  
 Et l'une et l'autre est pardurable.  
 Or elisons je vous empie  
 Desormais la meilleure partie :  
 Fol est qui choisit ou départ  
 Quant il eslit la pire part :  
 Deux voyes auons deuant nos yeux  
 Nous qui viuons jeunes et vieux.  
 Une a joye et repos mainno  
 L'autre a torment et a peine.  
 Pour joye et repos auoir  
 Bien fault faire doit on sauoir :  
 Qui mal fait et ne se repent  
 Il aura peine et torment.



Las et pour quoy prens tu si grant plaisir  
 Homme abusé plain de présumpcion.  
 En ce faulx monde on n'a que desplaisir  
 Enuie, orgueil, guerre et discension.  
 Bien malheureuse est ton affection :  
 Que pense tu, as-tu plus grant enuie  
 De viure en doubte en ceste courte vie  
 Qui les mondains à la mort d'enfer maine ;  
 C'est bonne chose de viure en vie certainne  
 Tu le sces bien, si tu nès insensible  
 Que c'est chose forte voire impossible  
 D'auoir ça jus ton aise entièrement  
 Et après mort la sus pareillement.  
 Hélas pour tant change condicion  
 Et te rauise, ou tu es autrement  
 Homme deffait et a perdicion.

Le quel veux tu, ou vie ou mort choisir  
 Choisy des deux, tu as discrécion  
 Aymes tu mieulx de ton corps le désir  
 Pour ton ame mettre a damnacion.  
 Que viure ung peu en tribulacion.  
 Et que après mort ton ame soit rauye  
 En gloire ès cieulx qui de nul déservie.  
 Estre ne peult en ceste vie humaine  
 S'il ne lesse terre, auoir et demainne  
 Et père et mère et tout s'il est possible  
 Et viure en peine et en labeur terrible


En seruant Dieu tousjours paciemment.  
 C'est le chemin qui conduyt seurement  
 Après trèspas l'homme a saluacion.  
 Et qui va autrement il va dampnement.  
 Homme deffait et a perdicion.

Cuide tu cy tousjours auoir loisir  
 D'auoir pardon sans satisfacion.  
 Et toute nuit en blanc lit mol gésir  
 Puis à ce jour sans operacion  
 Passer le temps en delectacion  
 Tant que du tout la char soit assouye :  
 Pense tu point qu'il faille qu'on deuie  
 Et que prengne fin puissance mondainne.  
 Hélas ouy, car mort viendra soudainne  
 Une heure a toy a tout son dart horrible  
 Si très a coup comme chose inuisible  
 Que pas n'auras loisir aucunement  
 De dire a Dieu peccai seulement.  
 Ainsi mourras tost sans contriction  
 Dont tu seras par diuin jugement  
 Homme deffait et a perdicion.

Homme en péril sache certainement  
 Que se tu n'as autre vouloir briefment  
 De t'amender n'autre deuocion  
 Tu te verras ung jour subitement  
 Homme deffait et a perdicion.

. Cy fine les dis des trois mors et trois vifs.





## *S'ensuit le débat du Corps et de l'Ame.*

Une grant vision la quelle est cy escripte  
 Jadis fut réuelée a Philibert l'ermite  
 Homme de saincte vie et de si grant mérite  
 Qu'onques ne fut par luy faulse parole dictée.

La nuit quant le corps et l'ame souuent veille  
 Aduint a ce pseudomme très grande merueille  
 Car un corps murmurant sentoit a son oreille  
 Et l'ame d'autre part que du corps ses merueille.

Venez estoit au siècle de grant extraction  
 Mais pour fuir le monde et sa décepcion  
 Quant luy fut réuelée icelle vision  
 Tantost deuint ermite par grant deuocion.

L'ame se plaint du corps et de son grant outrage  
 Le corps respond que l'ame a fait tout ce dommage :  
 Lors allèguent raison, lors allèguent usage  
 Tout ce retient l'ermite comme pseudomme et sage.

### *CY PARLE L'AME AU CORPS.*



Hée, doulant corps, dit l'ame, quel es tu deuenu  
 Tu estoie devant hier pour sage homme tenu  
 Deuant toi s'enclinoit le grant et le menu  
 Or es soudainement a grant honte venu.

Ou sont tes grans maisons et tes grans édifices  
 Tes cheuaux et tes tours faictes par artifices  
 Tes gentilz escuiers mis en diuers offices  
 Tout seul ès demouré comme musart et nice.

Ou sont tes nobles fiés, tes haultes signouries  
Et tant dè beaux manoirs, toutes tes métairies  
De tes bêtes à corne les grandes bergeries  
Rentes et reuenues qu'on te souloit païés.

Tu soloye dominer sur aultres comme roy  
Maintenant ont les vers la signorie de toy :  
Tu es bien renuersé et mis en désarroy  
Car tu n'as de tous biens la valeur d'un tornoy.

On estimoit ton fait hier une grant besoingne :  
Qui s'aprochoit de toy maintenant s'en esloigne  
Car tu es plus puanz que quelconque charcingne  
Nully ne te regarde qui n'ait de toy vergoingne.

Bien est le temps changé et la chance muée  
En lieu de grant maison et de chambre parée  
Entre sept piés de terre est ta char enserrée  
Et moy pour tes meffais en enfer suis damnée.

Moy que Dieu auoit faiete tant noble créature  
De très noble matière et de noble figure :  
Il m'auoit par baptesme faiete innoceente et pure  
Par toy suis en péché par toy suis en ordure.

Par toy dolente char suis de Dieu refusée  
Pour quoy bien dire puis: a quoy fuz oncques née  
Mieux me vaulsist assez que fusse anichillée?  
Ou du ventre ma mère au sépulere portée.

Tout comme as vescu en la mortele vie  
De toy bien ne me vint ne de ta compagnie  
A péché m'as attraite et a faire folie  
Dont j'en suis en grant peine, et tu n'y fauldras mie.

La peine que je endure surmonte tout martyre  
Que cuer pourroit penser ne langue saroit dire  
Sans confort, sans remède, a durer tend et tire :  
Quant peine tousjours dure il n'est mal qui soit  
pire.

Ou sont tes champs, tes vignes, tes terres cultivées  
Tes maisons, tes chevaux et haultes tours levées  
Tes pierres précieuses, tes couronnes dorées  
De l'or et de l'argent les sommes emboursées?

Ou sont tes lietz de plume et tes beaux couuerteurs  
Tes robes a rechange sur estranges couleurs  
Les espices confites pour diuerses saueurs  
Tes coupes et hennaps pour servir grans seigneurs ?

Ou sont tes esperuiers et tes nobles oyseaux  
Tes braches tes leuriers courans par les bois haults ?  
En lieu de sauuagine et daultre gras morceaulx  
Est ta char cy endroit viande aux vermicieux.

Le toiet de ta maison enuers toy fort saprouche  
Car tu giez sur le bas, le hault joint a ta bouche  
Tu n'as membre sur toy qui n'ait aucun reproche  
Os, char et cuir pourrit, tu n'as dent qui ne louche.

Ce que a par péché par long temps amassé  
Par force, et par rapine par serment faulsé  
Par peine, par labeur, par toy mesme lassé  
En une petite heure est ensemble passé.

Tu n'euz oneques parens ne amis en ta vie  
Qui n'ait horreur de toy et de ta compagnie  
Ta femme, tes enfants et toute ta maignie  
Ne donneroient pour toy une pomme pourrie.

Ils se passent de toy moult bien légèrement  
Car ilz ont maintenant tout en gouvernement  
Ton or et ton argent et tout ton tènement  
Tu n'as de demourant fors que ton dampnement.

De toute ta richesse, de toute ta substance  
Que tu leur as lessez en très grande habundance  
Ne donneroient pour toy ne pour ta deliuranee  
Pour un poure homme auoir ung jour sa substance.

Or peut doneques dolent corps sentir et prouuer  
Pour quoy on doit le monde fuir et réprouuer  
Car on ne peult en luy fors fallace trouver  
Et, si ne le peult on que par la mort prouuer.

Tu n'as plus maistre ouurier que riche robbe taille  
Car tu as la liurée de pouure garsonnaille  
Tu ne feras jamais a pouure gens la taille  
Ne n'auras grans cheuaulx pour entrer en bataille.

*La grande Danse Macabre.*

Le monde hier te portoit révérence et honneur  
 Les grans et les petis te clamoient leur seigneur  
 Il n'estoit si grant homme qui n'eust de toy peur:  
 Or tu as tost perdu ta gloire et ta valeur.

Regarde bien ta vie puis ta mort si remire  
 Tu as esté tirant qui tout prenoye a tire

Or te tire vermine et derompt et dessire  
 A tout ce que je diz ne sauroye contredire.

Tu n'as pas maintenant la peine et le torment  
 Que je souffre par toy sans quelque allègement  
 Mais tu l'auras après le jour du jugement  
 Quant reuiendras en vie, ou l'escripture ment.

*L'ACTEUR.*

Quant le corps vit que l'ame tellement se parmeine  
 Les dens estrainct moult fort et met toute sa peine  
 A gémir et se plaindre et la teste demene  
 Comme sopirer puis et prendre son alène.

Quant la teste ot leuée et sa vertu reprise  
 Si dit a l'esperit, j'ay mal mis mon service  
 Tu as prins plait a moy si comme folle et nice  
 Il ne finera pas du tout à ta deuisse.



CY RESPOND LE CORPS A L'AME.

Se n'est pas merueille se le corps se meffait  
Car de par soy en luy il n'y a rien parfait  
Légèrement s'encline et tantost a deffait  
Tout ce que le droit veult et ce que raison fait.

D'une part fiert le dyable, d'autre le monde rue  
Pour quoy la poure char ne pourroit estre vue  
Que ne soit par délit de léger abateur  
Ou par consentement desconfite et perdue.

Mais ainsi com tu dis Dieu ta faicte et crée  
De sens et de raison, d'entendement aornée  
Il ta faicte ma dame et a toy ma donnée :  
Ta chamberière suis, par toy suis gouvernée.

Puis doncques que Dieu ta sur moy donné puis-  
Et ta donné raison et clère congnoissance [sance  
Tu deusse auoir esté de telle providence  
Que je n'eusse fait mal par aucune ignorance.

Sages hommes doivent tous sauoir et entendre  
Que on ne doit la char ne blasmer ne reprendre :  
Le blasma en est à l'ame qui ne la veult deffendre  
Corps se doit déliter et tous ses aises prendre.

Se l'esperit ne fait la char considérer  
Chault, froit, fain et soif ne l'y fait endurer

Les délices mondaines la font desmesurer  
Si que sans péché gaire ne peult homme durer.

La char qui doit pourrir ne scet point de malice  
On la demaine ainsi comme une beste nice  
Légèrement s'encline a vertu ou a vice  
Mais l'esperit doit estre sa dame et sa nourrice.

Vices et péchés faire ce estoit ma nature  
Pour tant se j'ay mal fait je n'ay fait que droicture  
De droit faire ne doit aucune créature  
Estre blasmée, ne qu'on luy dye ou face injure.

Puis doncques que l'ame a la char encommande  
A la char il fault faire tout ce quelle commande :  
Je tiens à grant folie contre moy la demande  
Que tu faiz de péché, ne scay que me demande.

De toy vient le péché, de toy vient la folie  
Je ne puis plus parler ne te desplaise mie  
Car je sens entor moy une menue maignie  
Qui me mort et derompt, vaten et je ten prie.

Celle menue maignie sont plyseurs vermisseaux  
Gros enuiron comme sont pointes de fuseaux  
Mon ventre en est tout plain, si est toute ma peaux  
De moy ilz feront plus de cent mille morceaux.

# La grande Danse Macabre.

L'ACTEUR.

Lors a dit l'ame au corps : encor n'est pas a point Ta parole est amère, de douceur n'y a point  
De lesser la querelle ne le plait en tel point. La coulpe metz sur moy que durement me point.



CY PARLE L'AME AU CORPS.

Toy char pouure et dolente pleine d'iniquité  
Ta foiblesse m'a fait perdre ma dignité  
En tes paroles n'a aucune verité  
Et tout tant que tu dis n'est fors que vanité.

Verité est que l'ame doit la char châtier  
Mais la char ne se veult pour l'ame corriger  
Se l'ame la reprend ne fait que rechigner  
Tousjours veult gourmander, rifler, boire et men-

[ger.

Quand la char doit jeuner elle a mal en la teste  
Se elle ne boit matin c'est une grande tempeste :  
Un peu de pénitence luy fait si grant moleste  
Qu'on ne peult d'elle auoir joye, solas ne feste.

Je deuoye par droit auoir la signorie  
Mais tu la mas fortraite par ta lozengerie  
Tes délices charneux et ta maluaise vie  
Ou parfond puis d'enfer ont ma teste plongie.

Bien scay que j'ay erré quant ne t'ay refrenée  
Mais par tes flateries suis este barêtée :  
Par tes mondains plaisirs m'as après toy menée  
Pour cela plus grant peine te deust estre donnée.

Car tu es trop allez le chemin et la voye  
Des delictz corporeux que je te deffendoye,  
De l'ennemy d'enfer que toujours nous guerroye  
Pour quoy auons perdu de paradis la joye.

Le monde deuant hier te monstroït beau visage,  
Richesse te donnoit et délices au large  
Et si t'e promectoït de viure long eage :  
Ore te fait la moe, c'est paier ton musage.

L'ACTEUR.

Quant le corps voit que l'ame si trèsfort le reprend  
A crier et à braire vers elle se reprend  
Puis après simplement sa parolle reprend :  
Forment est dur le cueur à qui pitié n'en prent.

CY PARLE LE CORPS A L'AME.

Hélas, quant me pouuoye haultement maintenir  
Mes grans possessions et mes terres tenir  
Lors oncques de la mort ne m'e peult souuenir  
En piece ne cuidasse a tel honte venir.

Et si n'eust pas souffrit tout le temps de ma vie  
D'y auoir bien pensé et mis mon estudie :

que je ne fiz oncques ne heure ne demie  
r parler de mort je ne vouloye mie.

ne souffisoit pas tout le temps de ma vie  
ns autre chose faire, si non a estudie  
our bien viure et morir, mais je ne congnoissoye mie  
mal que je faisoye ne ma grande folie.

r voy je bien sans faille que a mort rien n'eschappe  
y vault or ne argent, manteau fourré, ne chappe  
ommandement de roy, ne autorité de pape  
rans et petis conuient passer icelle trappe.

en voy que es damnée et que je le seray  
a seuffrez maintenant, après je souffreray  
ais assez plus tu dois souffrir que ne feray  
t par moult de raisons je le te monstreray.

ray est que en pleuseurs pas, l'escriture raconte :  
unt plus Dieu donne a l'homme et tant plus haut le monte  
unt plus estroitement luy fauldra rendre compte  
t si fault à compter tant aura plus grant honte.

eu ta donné raison, sens et entendement  
blonté de fuir mauuais consentement  
puissance de faire son commandement  
ce rendras tu compte au jour du jugement.

es puissances nobles as forment abusé  
out ton temps as perdu et folement usé  
ton fait deuant Dieu est moult fort accusé :  
our quoy t'a par raison paradis refusé.

ais a moy qui ne suis que ta pouure portière  
e vermine assault et deuant et derrière  
eu ne m'auoit donné puissance ne manière  
ont je puisse sans toy aller n'auant n'arrière.

char ne peult sans l'ame ne venir ne aller  
onter en paradis ne enfer deualer  
ns l'ame ne peult elle ne sentir ne parler  
les uns reuétir, ne les pouures hosteler.

is se l'ame vouloit ouurer par bonne guise  
ner Dieu de bon cueur et faire son seruice

Honorer son prouchain et seruir sainte église  
Elle menroit la char du tout à sa devise.

Pour ce que j'ay esté tousjours a toy encline  
Ceste maison estroicte me débrise l'eschine  
Et selon l'ordenance de Dieu qui point ne fine  
Je suis toute puante et pleine de vermine.

L'escriture raconte que morir il conuient  
Et que dure sera une journée qui vient  
Quant peine temporelle éternelle deuient  
O comme fol est l'homme a qui point n'en souuient

L'ACTEUR.

A doncques s'escrie l'ame par grant affliction :  
Hée Dieu pour quoy m'as faicte de tel condicio  
Que je viuray tous temps sans terminacion  
En peine quant certain estoie de ma dampnacion

Je tien la beste brute plus que moy euré  
Car quant son corps est mort son ame est aliée  
Pour ce me vaultist mieulx que je fusse anichillé  
Quant fuz crée que d'estre ainsi tousjours damp  
[néc]

CY DEMANDE LE CORPS A L'AME.

Respond moy dit la char d'une telle demande :  
Ceulx qui sont en enfer en si grant pénitence  
Comme tu vas disant ont ils point d'espérance  
D'aucun allègement ne de leur deliurance?

Les nobles, les gentilz qui sont de hault parage  
Ou ceulx qui ont lessé or, argent en hostage  
Pour or ne pour argent, pour sens ne pour linag  
Sur les autres dampnés ont il point d'auantage

CY RESPOND L'AME AU CORPS.

Ta demande, dit l'ame, est trop peu raisonnable  
Car selon la sentence de Dieu ferme et estable  
Tous ceulx qui sont dampnés ont peine pardurable  
Ne force ne prière point ne leur est aidable.

Se tous religieux, prescheurs ou cordeliers  
Chantoient tous les jours messes, disoient mill  
[psaultiers]

Se le monde donnoit pour Dieu tous ses deniers  
N'en tireroient une ame de cent mille milliers.

Le dyable y est tousjours en la forsennerie  
De tormenter les ames il a tousjours enuie:  
Prometz luy, paye le, ton corps luy sacrifie  
Pour ce ne te donra ung grain de courtoisie.

Des nobles et des riches te diray la manière  
Sans grace sans déport leur peine est entière:  
Tant plus sont estés hault de tant plus sont arriere  
Et tant souffrent plus grant pouureté et misère.

On ne voit en enfer que ténèbres obscures  
Des ennemis sans nombre en horribles figures  
Dragons, serpens, crapaux, tous vélins et ordures  
Pour tormenter hélas les dampnées créatures.



L'ACTEUR.

Quant mectoit à parler l'ame toute sa cure  
Trois Dyables sont venus en leur laide figure

Tout horribles visages, plus grant contrefaiture  
Que on ne pourroit veoir en livre ne peinture.

Graffes de fer agues en leurs mains ils tenoient  
Feux grégois tout puant par la bouche gétoient  
Serpens enuelimés en leurs oreilles estoient  
Comme brandons de feu les yeulx flambans avoient

Un chascun de ces trois getoit sa gaffe torte  
La pouure ame ont chergie comme une beste morte  
Mais quant elle congnut d'enfer l'horrible porte  
Durement se complaint, forment se desconforte.

Et entre ces trois Dyables à haulte voix sescerie  
Secours moy, secours moy Jhésus fils de Marie  
Ne considère pas maintenant ma folie  
De David te souviengne et de ta courtoisie.

Quant les trois ennemis ont ce mot entendu  
Haultement ont cryé : trop avez actendu  
Musart : on doit avoir son temps bien despendu  
Deuant que le mérite de l'eure soit rendu.

Dor en auant ne vault rien le crier ne braire  
Car plus ne trouverez Jhésucrist debonnaire:  
Maintenant te conuient en ung tel lieu retraire  
Que jamais ne verras clarté ne lumineaire.

A ces dures nouuelles le pseudom se resueille  
S'il fut espouuenté ne fut pas de merueille:  
A mener bonne vie tantost il s'apareille  
Et servir Dieu du cueur des lors jour et nuit veille.

De tous péchés pardon Dieu nous veuille donner  
Et c'est mortelle vie tellement demener  
Que nous la puissions tous en sa grace finer  
Et avec luy joye pardurable mener.

A M E N.

*Cy finit le débat du Corps et de l'Ame.*



S'ENSUIT LA COMPLAINTE DE L'AME DAMPNÉE.



**O**us pécheurs qui fort regardez  
Cy de moy l'orrible figure  
De mal faire bien vous gardez  
Car ce monde bien petit dure.  
Auisé chascun en quel cure  
Pour les maux que j'ay faiz suis mis :  
Es dyables suis baillé eu cure  
Et en enfer est mon logis.

Las le monde m'auoit promis  
Que je viuroye longuement  
Las voyés je suis icy mis  
A jamais sans desinement.  
Et combien que j'eusse souuent  
Eu volanté de m'amander  
Pour la mort qui m'a prins courant  
Je n'y ai eu remédier.

Donc braire me fault et crier  
Pour le gref mal et le torment  
Qu'il me conuient cy endurer  
A jamais pardurablement.  
Chascun apparçoit vrayement  
Que de la mort suis suppléante  
Viure cuydoye longuement  
Et en enfer si ma planté  
Pour ce chascun entalenté  
Soit de bien viure en ce monde  
Affin que par son orphante  
En mort Dieu ne le confonde.

Vray est que quant j'estoye au monde  
En mal mectoye toute ma cure :  
Pour ce que du bien ne tins compte  
Le mal m'est torné a usure.

Aprens a viure moyennement  
Ainsi viuras plus seurement  
Car de tant plus haut monteras  
Plus a la fin dolent seras.

Fuy orgueil et fuy auarice,  
Ayme Dieu et garde justice  
De trop hault estat ne te chaille  
Car le plus hault ne vault pas paille.

L'estat du monde est variable  
Ne cuyde nul qui soit estable  
Le temps se change en peu d'heure :  
Tel rit au matin qu'au soir pleure.

Tant que tu seras en puissance  
Chascun te fera réuérrence  
Mais se fortune t'est contraire  
Adonc verras chascun retraire.

Nul ne tiendra de toy plus compte,  
Et fusses filz de roy ou conte  
Chascun de toy s'elloignera  
Et comme fol te laissera.

Fortune n'est pas tousjours une  
Comparé tu es a la lune  
Qui croist et décroist en peu d'heure,  
En ung estat point ne demeure.

Fol est l'homme qui trop se fie  
En fortune, je le affie  
Son estat est trop deceuable  
Et en peu d'heure variable.

Regarde tout l'estat du monde  
Et premier cil qui plus habonde  
En richesse et auctorité  
Tu trouueras tout vanité.

Que te vault ce que tu es riche  
Puisque tu es auer et chiche.  
De bien faire tu te retardes  
Et si tu ne scès pour qui tu gardes.

Fol est qui trop cuyde estre saige  
Et qui baille son ame en gaige  
Pour assembler trop grant auoir.  
Mieux vault assez que trop auoir.

Le fol souuent en sa follie  
Prent plésir et se glorifie  
En ce qui lui est tout contraire  
Et faulte de sens luy fait faire.

Toy qui mets au monde ta cure  
Pence au mal à la peine dure  
Que les pécheurs endureront  
Quant en enfer trébucheront.

Tu voys mourir et folz et saiges  
Foibles et fors, et roys et paiges.  
Tu voys que mort n'espargne rien  
Pense doncques de faire bien.

Tu ne scès quant departiras  
De ce monde ne ou tu yras.  
Mais au moins crois sur toute rien  
Que bien auras se tu fais bien.

Tu trouueras certainement  
Après ta fin tant seullement  
Le bien ou le mal que feras  
Et selon ce, jugé seras.

Tant que tu vis et a de quoy  
Pence en ce monde de toy  
Et n'atens pas que tes parens  
A la fin te soyent garens.

Or regardez et aduisez  
 Que par orgueil vous desguisez  
 Que tel fierté proffitera  
 A celluy qui dampné sera.

Regarde ta fragilité  
 Ainsi auras humilité

Trop grant orgueil t'abaissera  
 Humilité tessaulsera.

Puis que voyons certainement  
 Que mourir fault finablement  
 Pensons doncques de si bien viure  
 Que d'enfer nous soyons deliure.

AMEN.

*Cy finit la Danse Macabre hystoriée et augmentée de pleuseurs nouveaux personnages et beaux dis. et les trois mors et les trois vif ensemble, nouuellement ainsi composée et imprimée par Guyot, marchant demorant à Paris, ou grant hostel du collège de Nouarre en Champ gaillart, l'an de grace mil quatre cent vingz et six, le septième jour de juing.*



LILLE, IMPRIMERIE DE HOREMANS.





2  
408.15



